

LAI SIMIANG PHUK TIX

(1Kings)

1 *Adawniyax Sang Yuh Simiang*
Simiang Davit riex ju mai hoik kuad hu sipie, viang kix lhop prux ka piang nawh kawx, nawh ang siu ka. ² Mawh kheu nan, kawncau nawh khankix ah nin ka nawh, "Kieh yix sawg bunkrih awn ju tixkaux son simiang ex! kieh sibun an mawh cao priex rien ka maix, kieh nawh it ka piang naok maix, sonsang pon simiang ti siu ka heue." ³ Mawh kheu nan, kix hu sawg sibun mhawm grang pa awn ju tix kaux ka dauh haktiex pa kuang pui Isarelix, kix yaox Abisha sibun veng Shunam kix viex sibun an hoek ka simiang heue. ⁴ Sibun paawn ju an, kied mhawm grang tete, nawh hoik priex rien ka simiang, viang mawh nan, simiang ang dex dawd mai nawh heue. ⁵ Adawniyax kawm simex Hagit yaw ti ah nin, "Aux tak yaog ti mawh simiang heue." Nawh khre rien linglawx naing brung mai cub pui naing brung khankix pa sang to ka plak sivoe nawh tixphan kaux heue. ⁶ Keeing nawh Davit ang sax ah nin ka nawh tom saux rhawm nawh tix bawg kawx, "Kheu maix lai yuh ceu in yuh ka mawx?" Jao mawh nawh pa kied mhawm grang tix kaux, nawh kawm mawh pux Abasalom heue. ⁷ Khaix an nawh hu kum tau mai Yuabax kawm simex Zeruya mai ka cao giex kaing li Abiatha khankiex, kix hawt khaix nawh mai teem ka Adawniyax heue. ⁸ Viang mawh nan, cao giex kaing li Zadok mai Beneyax kawm simex Yehoyadax mai cao jhai Natan, Shimi, Re-i mai pui kua pui vao Davit khankix, ang cu ti ot plak Adawniyax heue. ⁹ Adawniyax yuh krax tan ka yung mai mawie pa kluing khankix hawt rang Zawheliet pa koe hawt baoh haktiex Enrawgelax, nawh ghaok pux nawh pa mawh kawm simiang mai pui Yudax mai kawncau simiang khawmuik. ¹⁰ Viang mawh nan, nawh ang ghaok cao jhai Natan mai Beneyax pui kua pui vao mai pux nawh Sawlamon heue. ¹¹ Yam an Natan hu kraik grawng in ka Batashebax

1:52Sa3:4. 1:112Sa12:24.

miex Sawlamon ah nin, "Ang maix nyang mhong grawng pa keud kawm simex Hagit Adawniyax ti sang yuh simiang lie? Cao simiang ex Davit kawx ang nyang tawng ka grawng in heue." ¹² Sonsang klawd ju maix mai kawm simex maix Sawlamon, yam in kieh aux tawx krax keud ka maix liak? ¹³ Niied ti hu ka simiang Davit ah nin ka nawh, cao simiang aux eue, maix hoik tiextu ka kawncau sibun maix ah nin, "Kawn simex maix Sawlamon tak mawh pa plud ti kuang haktiex khaix aux mai nawh tak yaox ti ngawm ka piang dangngeung aux ang mawh lie? "Jao patix Adawniyax yaog ti mawh simiang lie? ¹⁴ Yam kawm sikah maix tau mai simiang tan aux tak hawt khaix maix mai aux tak joh ka lox maix heue." ¹⁵ Mawh kheu nan, Batashebax laig ka dauh lawg it simiang, simiang hoik kied kuad mai Abisha kawm sibun veng Shunam hoik priex rien ka simiang heue. ¹⁶ Mai Batashebax gup kaing tix sivoe nawh mai krub ka simiang, khaix an, simiang ah nin, "Sang lo maix patix?" ¹⁷ Batashebax ah nin ka nawh, "Simiang eue, maix hoik tiextu ka siliex sibun maix ka sivoe Simiang Siyiex Siyiex maix pa ah nin, kawm simex maix Sawlamon tak mawh pa kuang haktiex khaix aux mai nawh tak mawh pa ngawm ka piang dangngeung aux heue." ¹⁸ Yam in Adawniyax yaog ti mawh simiang, maix simiang aux kawx ang nyang tawng ka grawng in heue. ¹⁹ Nawh yuh krax tan ka mawie, yung pa kluing khankix tomnie mai ghaok cub kawm simiang khankix mai cao giex kaing li Abiatha mai Yuabax cao kaing naing ting krunaing maix khankix, viang mawh nan, nawh ang ghaok ka kawncau maix Sawlamon heue. ²⁰ Cao simiang aux mai simiang aux eue, pui Isarelix hoik jhak ka maix sonsang kraik maix pui mhong grawng sang mawh pui mawx pa plud ti ngawm ka piang dangngeung cao simiang aux khaix maix heue. ²¹ Phan ang mawh nan, khaix hoik

laig it simiang tau mai taxdu tix, kawm simex aux Sawlamon mai khawm tokaux aux tak sang lih mawh pui pa lud heue.”²² Yam kawm sikah Batashebax mai simiang, cao jhai Natan hoek laig ka dee an heue.²³ Kix kraikrawng hoek Natan ka simiang ah nin, “Cao jhai Natan hoik hoek,” Yam hoek nawh ka plak sivoie simiang, nawh gup ngai tix piang tiex mai krub ka simiang heue.²⁴ Natan ah nin, “Cao simiang mai simiang aux eue, mawh hoik ah maix nin, aux tak kieh Adawniyax plud ti kuang haktiex khaix aux mai ngawm ka piang dangngeung aux heue.²⁵ Mawh kheu lih hu nawh daux in singaix mai yuh krax tan ka mawie mai yung pa kluing tomnie mai ghaok kawm simex simiang khankix mai cao kaing naing mai cao giex kaing li Abiatha mai kix hoik ih nyaux ka plak sivoie nawh ah nin, kieh simiang langju heue.²⁶ Viang mawh aux kawncau maix mai cao giex kaing li Zadok, Beneyax kawm simex Yehoyadax mai kawncau maix Sawlamon nawh ang ghaok yix heue.²⁷ Mawh in pa hoik yuh simiang aux lie? Mai simiang ang nyang kraikrawng ka kawncau tix, mawh pui mawx pa sang ngawm ka piang dangngeung cao simiang khaix maix heue.”

Sawlamon Mawh Simiang

²⁸ Khaix an simiang Davit ah nin, “Kok Batashebax hoek ka aux,” mawh kheunan, Batashebax hoek mai cung ka plak sivoie simiang heue.²⁹ Mai simiang tiextu ti ah nin, “Awm im ju Simiang Siyiex pa hoik taoh ju aux khaing pa kharhawm kuceu,³⁰ awm hoik tiextu aux ka Simiang Siyiex pui Isarelaax ah nin, kawm simex maix Sawlamon tak mawh simiang khaix aux mai nawh takngawm ka piang dangngeung aux mai mawh cao pa plud dee ot aux, mawh kheu nan aux tak yuh awm an daux in singaix heue.”³¹ Khaix an, Batashebax gup ngai tix ka piang tiex, krub ka simiang ah nin, “Kieh simiang aux Davit im ju leeingju heue.”³² Simiang Davit ah nin, “Kok cao giex kaing li Zadok mai cao jhai Natan mai Beneyax kawm simex Yehoyadax hoek ka aux” Mai kix hoek ka plak sivoie simiang heue.³³ Simiang ah nin ka kix, “Kok kawncau cao simiang pex khankix hu tau mai pex mai kieh kawm simex aux Sawlamon brug law cie aux

mai viex nawh hu ka veng Gihon heue.³⁴ Kieh cao giex kaing li Zadok mai cao jhai Natan groi bee ka piang nawh mai yaog nawh mawh simiang ka piang pui Isarelaax mai phlu teettawng ah nin, kieh simiang Sawlamon langju heue.³⁵ Khaix an pex tak hawt khaix nawh mai nawh tak ngawm ka piang dangngeung aux mai plud ti mawh simiang dee ot aux, mawh kheu aux hoik yaog nawh mawh pa kuang ka piang pui Isarelaax mai ka pui Yudax heue.”³⁶ Beneyax kawm simex Yehoyadax deeh ah nin ka simiang, “Amen, kieh Simiang Siyiex Cao simiang aux ah awm an heue.”³⁷ Awm hoik ot Simiang Siyiex tau mai simiang aux, kieh Nawh Cao nie baot ot tau mai Sawlamon mai kieh dangngeung nawh nie ting lhaong khaing dangngeung cie simiang aux Davit heue.³⁸ Mawh kheu nan, cao giex kaing li Zadok mai cao jhai Natan, Beneyax kawm simex Yehoyadax, pui Kheretix mai pui Peletix khankix lih hu mai kieh Sawlamon brug piang law cie simiang Davit mai viex nawh hu ka veng Gihon heue.³⁹ Khaix an, cao giex kaing li Zadok teei bee pa koe daux lawk rung khaing daux nyiex buan man mai groi ka piang kaing Sawlamon mai kix phlu teettawng mai pui khawmuik ah nin, “Kieh simiang Sawlamon langju heue.⁴⁰ Pui pa hawt khaix nawh khawmuik, phlu lawkleh khawm kied gaurhawm tix mai awm pa dex sang bih haktiex, kheu kied yo kix lox tix sinum heue.⁴¹ Khaix hoik ih kix priex Adawniyax mai can nyosinie pa ot tau mai nawh khankix mhong lox ceu an mai yam mhong Yuabax ka lox teettawng nawh ah nin, “Veng chix sinum siaox yuh nin kheu grawng pa yuh ka mawx lie?”⁴² Yam kawm sikah Yawnatan kawm simex cao giex kaing li pa kaux Abiatha hoek ka nawh tan mai Adawniyax ah nin ka nawh, “Laig heue maix mawh pui mhawm tix kaux mai viex lox gaurhawm hoek heue.”⁴³ Yawnatan pawk ah nin ka Adawniyax, “Ang mawh, simiang ex Davit hoik yaog Sawlamon mawh simiang phao heue.”⁴⁴ Simiang ploi cao giex kaing li Zadok mai cao jhai Natan mai Beneyax kawm simex Yehoyadax, pui Kheretix, pui Peletix hu tau mai Sawlamon mai kix kieh simiang

Sawlamon brug law cie simiang heue. ⁴⁵ Mawh kheu cao giex kaing li Zadok mai cao jhai Natan hoik groi bee ka piang kaing nawh mai hoik yaog nawh mawh simiang ka dauh veng Gihon mai kix lih hu khaing tan khawm krax pa gauxrhawm, mawh kheu nan, veng sinum siox jao lox yo pui khankix awm pa hoik mhong maix heue. ⁴⁶ Simiang Sawlamon hoik ngawm ka piang danggeung simiang heue. ⁴⁷ Lheu khaing an, cub kawncau simiang khankix hu nawb buan ka simiang ex Davit ah nin, "Kieh Siyiex yaog min ceukaux simiang Sawlamon nielheu khaing min ceu kaux maix mai kieh Nawh Cao yuh danggeung nawh nielheu ting khaing danggeung maix, khaix an simiang gup kaing tix ka piang ku it tix heue. ⁴⁸ Simiang rawgbuan ah in, kieh Simiang Siyiex pui Isarela koe buanson, kheu hoik tawx Nawh pui tix kaux sonsang ngawm ka piang danggeung aux dauh in singaix, glang kawm yaox ngai aux ka ceu an heue" ⁴⁹ Khaix an, cub nyosinie pa ot tau mai Adawniyax koe krax lhatgraung mai kix tang yaog ti ing krax hu tix kaux mawx kaux an heue. ⁵⁰ Adawniyax lhatgraung ka simiang Sawlamon heue. Mawh kheu nan, nawh yaog ti kaoh mai hu giex ka rung khu dee tan heue. ⁵¹ Kix krai grawng an ka simiang Sawlamon ah nin, "Adawniyax hoik lhatgraung ka maix simiang Sawlamon tete heue. Nawh hoik giex ka rung khu dee tan ah nin, "Kieh simiang Sawlamon yuh krax tiextu ka aux dauh in singaix, son ang nawh sang pah aux yum ka vaig heue" ⁵² Khaix an, simiang Sawlamon ah nin, "Phan nawh pon jhi mhairug pa mawh tix pui mhawm, hauk kaing nawh tak ang cod piang tiex tix gawng kawx, viang mawh nan, phan yaox pa caox ka dauh tokaux nawh, nawh tak mawh pa yum tete heue." ⁵³ Simiang Sawlamon ploi pui hu teei nawh lih khaing khu dee tan mai nawh hoek gup kaing tix sivoie simiang Sawlamon mai simiang ah nin ka nawh, "Deeh ing ka nyiex maix heue."

2 Lox Ghoik Davit Ti Krai Ka Sawlamon

2 Yam hoek bawgyam dex sang yum Davit mai nawh ghoik ti tawm lox ka kawm simex tix Sawlamon ah nin, ² Aux **2:5** 2Sa 3:27, 2Sa 20:10. **2:7** 2Sa 17:27-29. **2:8** 2Sa 16:5-13, 2Sa 19:16-23.

tak hu ka dauh krax pa hu kawm pui haktiex khankix, mawh kheu nan, teei riang rao tix mai kieh maix awm simex heue. ³ Priex ti hawt lox tawm jhawm krai Simiang Siyiex maix mai lawng hu dauh krax Nawh Cao mai priex ti hawt lox tat jhawm prawng Nawh Cao mai lox pingnyap Nawh Cao mai lox been prawngsee Nawh Cao mai mhairug Nawh Cao, awm pa tiem ti deuh ka dauh lai pingnyap Mose, sonsang haokhuan ting lhaong maix ka dauh ceu pa yuh tix khawmuik mai ka can dee hu maix, ⁴ sonsang kieh Simiang Siyiex gumlox Nawh Cao grumnaog awm pa hoik krai Nawh Cao ka grawng pa dex mai aux yuh nin, phan kawm praix maix chix yuh satix tix mai lawng ti hu plak sivoie Aux dauh krax pa mawh pa meh khawm rhawmrhi mai khawm ju tix khawmuik, ru maix tak ang jud khaing danggeung pui Isarela khankix heue. ⁵ Lheu khaing an, maix hoik tawng ceu pa hoik yuh Yuabax, kawm simex Zeruya ka aux mai pa hoik yuh nawh ka cao kaing naing ting pui Isarela pa kaux Abana kawm simex Nerax mai Amasa kawm simex Yeta pa hoik pah nawh ka kiex mai hoik kieh nham kiex jauh ka dauh bawgyam pa yiienyawg mai nawh hoik kraix nham kiex ka piang maox rawd nyoi tix mai ka piang kiep pa ceep nawh ka caong tix heue. ⁶ Mawh kheu nan yuh awm pa koe pingnya cuyi maix mai paw kieh hauk kaing paing nawh laig ka dauh meung yum ka dauh pa yiienyawg heue. ⁷ Viang mawh nan, jhi krax cauxrhawm maix ka kawm simex Bazilie pui Gilat mai kieh kix ot sinax pui pa ih priex ka pheem sawm maix, mawh kheu hoek kix ti yuh buanson ka aux, yam lih to aux ti luan khaing puxke maix Abasalom heue. ⁸ Shimi kawm simex Gerax pui Benjamin khaing yaong Bahurim ot tau mai maix, nawh hoik jhaxlawg mai sibriem ka aux, yam hu aux ka veng Mahanem, nawh hoek ti rieb aux ka rawm klawng Yawdan mai aux hoik tiextu ka nawh, plak sivoie Simiang Siyiex ah nin, aux tak ang kieh maix yum ka vaid heue. ⁹ Paw keud nawh awm pa ang koe phimap, mawh kheu mawh maix pui koe pingnya cuyi, maix tawng ceu pa sang khaw maix ti yuh ka nawh, mawh kheu

nan pah ka pui pa paing hauk kaing an laig daux meung yum tau mai nham nawh heue."

Grawng Yum Davit (1Been 29:26-30)

¹⁰ Simiang Davit laig it tau mai taxdu tix khankix mai sipaung nawh ka daux veng Davit heue. ¹¹ Nawh hoik kuang ka piang pui Isarelax tixpon num, nawh kuang ka daux veng Hebron aliah num mai kuang ka daux veng Yerusaliem tixngoe loe num heue. ¹² Khaix an, simiang Sawlamon ngawm ka piang dangngeung keeing tix simiang Davit mai haktiex pa kuang nawh khankix mawh pa haokhuan kauxcong heue.

Sawlamon Pah Ka Adawniyax

¹³ Adawniyax kawn simex Hagit hoek ka Batashebax pa mawh miex simiang Sawlamon mai Batashebax ah nin ka nawh, "Mawh hoek maix ka daux krax pa nhim lie?" Mai nawh deeh ah nin, "Aux hoek daux krax pa nhim heue." ¹⁴ Nawh deeh ah nin, "Aux koe lox pa sang chawk ka maix tix ceu," mai Batashebax deeh ah nin, "Chawk heue." ¹⁵ Khaix an nawh ah nin, "Maix hoik tawng ka caw aux ti mawh simiang mai pui Isarelax khankix kawx hoik koe krax keud pot jun pot ka aux sonsang mawh aux pa kuang ka piang kix heue." Viang mawh nan haktiex in hoik veeh ti khaing aux mai hoik deeh lih ti mawh cie pux aux, mawh kheu an hoik mawh alo Simiang Siyiex heue. ¹⁶ Yam in "Aux simie ti rawg tix ceuceu ka maix, paw doh thiang liak!" mai Batashebax ah nin ka nawh, "Krai heue." ¹⁷ Nawh krai ah nin, "Yuh buanson krai ka simiang Sawlamon, mawh kheu nawh ang pon thiang ka lox maix, kieh nawh tawx aux moeng Abisha kawn sibun veng Shunam heue." ¹⁸ Batashebax ah nin, "Mhawm, aux tak sang krai son maix ka simiang heue." ¹⁹ Mawh kheu nan, Batashebax hu ka simiang Sawlamon, sonsang krai grawng Adawniyax mai simiang kaoh ti rieb ka Batashebax mai num kaing tix tawx krax nabyam ka nawh mai tawx dee ngawm dangngeung tix mu son miex tix mai Batashebax ngawm ka plak taix khawn dawm simiang heue. ²⁰ Khaix an, **2:11** 2Sa 5:4-5; 1Been 3:4. **2:12** 1Been 29:23. **2:26** 2Sa 15:24, 1Sa 22:20-23. **2:27** 1Sa 2:27-36.

nawh ah nin, "Aux sang rawg totaix pa iak tix ceu ka maix, paw thiang ka liak!" Simiang ah nin ka nawh, miex aux eue, "Rawg heue, aux ang thiang ka lox maix heue." ²¹ Nawh ah nin, "Tawx Abisha kawn sibun veng Shunam mawh moeng puxke maix Adawniyax heue." ²² Simiang Sawlamon pawk lox miex tix ah nin, "Jao patix maix lai mhaing Adawniyax moeng Abisha kawn sibun veng Shunam, deeh baoux mhaing meung haktiex in ka son nawh ha, nawh mawh puxke aux, rawg ka son nawh mai son cao giex kaing li Abiatha mai son Yuabax kawn simex Zeruya heue." ²³ Khaix an, simiang Sawlamon tiexu ka daux ceukaux Simiang Siyiex ah nin, "Phan lox pa ah Adawniyax ang mawh pa keung nawh ti yum kah, kieh Siyiex yuh ceu pa nie langteung ka piang aux heue. ²⁴ Awm im ju Simiang Siyiex mai hoik yaog aux ngawm ka piang dangngeung keeing aux simiang Davit mai hoik tawx aux ot ka daux nyiex haw, awm lox mukheu pa hoik yuh Nawh Cao, Adawniyax tak mawh pa yum daux in singaix heue." ²⁵ Mawh kheu nan, simiang Sawlamon ploi Beneyax kawn simex Yehoyadax hu mai kieh pah Adawniyax yum heue.

Grheu Ka Abiatha Mai Pah Ka Yuabax

²⁶ Son cao giex kaing li Abiatha simiang ah nin, "Hu ka veng Anatotka haktiex cao maix, mawh kheu maix keung ti mawh pa yum, viang mawh nan, aux ang nyang pah maix yum yam in, jao hoik klawm maix teug buan sijax mukheu Simiang Siyiex ka plak sivoe keeing aux simiang Davit mai maix hoik kham krax kharhawm ku bawg tau mai keeing aux heue." ²⁷ Sawlamon pluut ara Abiatha khaing cao giex kaing li Simiang Siyiex mai sonsang pon kieh nawh gumlox Simiang Siyiex grumnaog, ka pa hoik krai Nawh Cao grawng pa dex mai doeh nyiexma Elix ka daux veng Shilaw heue. ²⁸ Yam hoik mhong Yuabax grawng ceu an, nawh ot ka plak Adawniyax, viang mawh nan, nawh ang ot plak Abasalom mawh kheu nan, Yuabax to laig daux nyiex gox buan man Simiang Siyiex mai giex ka rung khu dee tan heue. ²⁹ Kix krai grawng an ka simiang Sawlamon ah nin, "Yuabax hoik to laig daux nyiex gox buan

man Simiang Siyiex, nawh ot hawt khu dee tan, khaix an simiang Sawlamon ploi Beneyax kawn simex Yehoyadax hu pah nawh yum heue.”³⁰ Beneyax hu ka nyiex gox buan man Simiang Siyiex ah nin ka nawh, “Simiang nhie maix lih plak praix, ” Mai Yuabax ah nin, “Ang aux lih, aux sang yum tin, ” mai Beneyax ing krai ka simiang ah nin, “Yuabax krai mai deeh pawk ah nin ka aux heue.”³¹ Simiang deeh ah nin ka nawh, “Yuh awm pa ah nawh, pah nawh yum mai sipaung nawh sonsang luan nham pa hoik jauh Yuabax pa ang koe phimap kieh singai khaing aux mai khaing paox nyiex keeing aux khankix heue.³² Mawh kheu nan, Simiang Siyiex kieh nham phimap pa yuh nawh hoek ka piang kaing cao nawh, mawh kheu hoik pah nawh pui ra kaux pa nie rahsee pa nie mhawm khaing nawh yum ka vaid pa mawh Abana kawn simex Nerax cao kaing naing ting pui Isarelaix mai Amasa kawn simex Yeta cao kaing naing ting pui Yudax, dau pa ang keeing aux simiang Davit tawng ka heue.³³ Mawh kheu an, nham phimap kix tak hoek ka piang kaing Yuabax mai ka piang kaing doehru nawh leeingju, viang mawh nan, ka piang simiang Davit mai doehru nyiex ma nawh mai ka piang danggeung nawh, krax pa nhim khaing Simiang Siyiex tak koe leeingju heue.”³⁴ Mawh kheu nan, Beneyax kawn simex Yehoyadax haok dau nyiex gox buan man mai pah nawh yum mai sipaung nawh ka dau nyiex nawh pa koe dau tiag heue.³⁵ Simiang deeh yaog Beneyax kawn simex Yehoyadax mawh cao kaing naing ting ka piang dee ot Yuabax mai yaog Zadok mawh cao giex kaing li ka dee ot Abiatha heue.

Grawng Pah Ka Shimi Yum

³⁶Khaix an simiang deeh ploi pui kok Shimi hoek ah nin ka nawh, “Sum maix ot nyiex dau veng Yerusalieim tix lhang mai paw lih hu khaing tan heue.³⁷ Deuh maix tawng lox in mhawmmhawm, singaix lih hu maix khaing tan mai tiang ka rawm klawng Kidron maix tak yum tete, nham phimap maix tak hoek ka piang kaing maix heue.”³⁸ Shimi deehah nin kasimiang, “Ceupakraimaix

mawh pa mhawm, kawncaw maix tak yuh awm pa krai maix simiang,” Mawh kheu nan, Shimi ot ka dau veng Yerusalieim tom rheeng heue.³⁹ Khaix hoik luan loe num siliex Shimi ra kaux to hu ka Akhix kawn simex Makha simiang veng Gata mai krai grawng an ka Shimix ah nin, “Siliex maix ot dau veng Gata heue.”⁴⁰ Shimi kaoh mai sau an brug tix ka piang la mai hu ka Akhix dau veng Gata, sonsang hu sawg ka siliex tix khankiex, Shimi hu mai deeh viex kiex hoek heue.⁴¹ Kix krai grawng lih Shimi khaing veng Yerusalieim mai hu ka veng Gata mai grawng deeh hoek nawh khaing tan ka simiang heue.⁴² Khaix an, simiang ploi pui kok Shimi ah nin ka nawh, “Aux hoik kieh maix tiextu ka dau ceukaux Simiang Siyiex mai hoik tawx satix ka maix, deuh ti tawng mhawmmhawm singaix yam lih maix plak praix mai yam hu dee mawx angah maix tak yum tete ang mawh lie? Yam an maix deeh ah nin ka aux, lox krai maix ka aux mawh pa mhawm heue.⁴³ Yuh ka mawh maix lai ang priex ti hawt lox sijax pa yuh tix ka Simiang Siyiex mai ka lox pingnyap pa tawm aux ka maix,”⁴⁴ Simiang baoh ah nin ka Shimi, “Maix hoik tang tawng dau rhawm tix, ka pa caoxcaig pa hoik yuh maix khankix ka keeing aux Davit, mawh kheu nan, Simiang Siyiex tak kieh pa caoxcaig pa yuh maix khankix hoek ka piang kaing maix heue.”⁴⁵ Viang mawh nan, simiang Sawlamon mawh pa pon buanson mai danggeung Davit tak mawh pa kauxcong plak sivoe Simiang Siyiex leeingju heue.⁴⁶ Khaix an, simiang tawx lox ka Beneyax kawn simex Yehawiyadax, nawh hu mai pah Shimi yum, mawh kheu nan meung haktiex lih mawh pa kauxcong dau tawm taix simiang Sawlamon heue.

3 Sawlamon Teei Kawn Sibun Pharaw

Sawlamon yuh paoxpie tau mai Pharaw meung Ejiptux mai nawh teei ti moeng kawn sibun Pharaw, khaix an nawh viex sibun an ing ka veng Davit mai kiex ot tan tom hoik sum nawh nyiex haw tokaux tix mai nyiex buan Simiang Siyiex mai guh veng Yerusalieim heue.² Yam an, mawh kheu ang nyang sum nyiex buan son ceukaux Simiang

Siyiex tan tix lhang kawx, pui khankix yuh krax tan pa appong ka dee pa lhaong heue.

Sawlamon Rawg Pingnya (2Bee 1:1-13)

³ Sawlamon moh ka Simiang Siyiex mai nawh hawt grawng lawng khaix lox tat jhawm prawng pa deuh keeing nawh Davit mhawmmhawm, lheu khaing an nawh appong krax tan mai gleeing nyawng bhawng ka dee pa lhaong heue. ⁴ Yam an simiang lih hu ka veng Gibon, sonsang appong krax tan tix, mawh kheu dee an mawh dee pa kied ting lhaong, Sawlamon tan totan pa gleeing ka piang khu dee tan tix rheng mu heue. ⁵ Simiang Siyiex lih bleeh ka Sawlamon dauveng Gibon ka dauveng camaox ponsawm ah nin, "Simie maix Aux tawx ceu patix ka maix lie?" ⁶ Sawlamon ah nin, "Maix Cao hoik jhi krax pa cauxrhawm tix ka kawncau Maix keeing aux Davit, mawh kheu nawh hawt grawng lawng khaix Maix Cao dauveng krax pa mawhmeh mai pa rahsee mai pa rahrhawm tix sivoie Maix Cao, Maix Cao hoik tawx krax cauxrhawm pa ting lhaong ka son nawh mai hoik tawx kawncau simex ka nawh pa sang ngawm ka piang dangngeung nawh, awm pa koe dauveng in singaix heue. ⁷ Simiang Siyiex eue, Maix Cao hoik yaog kawncau Maix mawh simiang pa plud keeing aux Davit, viang mawh nan, aux kawncau mawh nyawm, aux ang tawng grawng pa sang lih sang laig tix heue. ⁸ Kawncau Maix Cao ot sigreung pui Maix pa hoik laig Maix ti teei mawh pui ting mai pa ang lai uik simin heue. ⁹ Mawh kheu nan, tawx pingnya krax tawng ka kawncau Maix, sonsang chix prawngca aux ka pui Maix khankix mai sonsang chix goih aux ka pa mhawm mai pa caox, mawh pui mawx pa sang pon prawng ka cub pui haoh pui hun nieding niedod lie?" ¹⁰ Lox buan pa rawg Sawlamon mawh pa khawrhawm Simiang Siyiex ka heue. ¹¹ Simiang Siyiex ah nin ka nawh, "Mawh kheu maix ang rawg krax langju mai ang rawg krax magmi mai ang rawg sonsang laux ju pui pa koeng ka maix khankix, viang mawh nan maix rawg ngie pingnya krax tawng sonsang chix prawngca tix ka dauveng pa rahsee, ¹² Aux tak tawx awm pa rawg maix, jhakheue, Aux hoik tawx rhawm pa naog mai

pingnya cuyi ka maix, ang koe pui pa awm maix sivoie in tix kaux kawx mai ang lai koe pa awm maix khaix in tix kaux kawx heue. ¹³ Aux baoh deeh tawx ceu pa ang maix rawg, krax magmi mai min plakngai ka maix, glang singaix yam im ju maix, simiang pa awm maix tak ang koe tix kaux kawx heue. ¹⁴ Phan maix lawng hu dauveng krax Aux mai prixi ti hawt lox tat jhawm prawng Aux mai lox pingnyap Aux khankix, awm hoik lawng keeing maix Davit khaix Aux, Aux tak kieh singaix pa im ju maix lang heue." ¹⁵ Yam siduad Sawlamon khaing it tix, nawh tawng ka mawh camaox, khaix an nawh hu ka veng Yerusalieim mai cung ka plak sivoie teug buan sijax mukheu Simiang Siyiex mai tan krax tan pa gleeing mai krax tan pa nhim mai yuh pawie khankheue son kawncau tix khankix heue.

Krax Prawngca Sawlamon

¹⁶ Yam an, sibun coh kaux ra kaux hoek cung ka plak sivoie simiang heue. ¹⁷ Sibun an tix kaux ah nin, "Simiang eue, sibun in mai aux ot dauveng nyiex tix lhang, aux hoik keh glang yam ot yiex tau heue. ¹⁸ Yam hoik naog loe ngaix, sibun in kawx keh mai yiex ot tau, pui tang kaux ang ot tau mai yiex tix kaux kawx dauveng nyiex heue. ¹⁹ Kawncau simex sibun in hoik yum ponsawm, kheu jao gut nawh yam it tix heue. ²⁰ Mawh kheu nan, nawh kaoh greung sawm, yam laig it aux mai teei kawncau simex aux khaing aux mai deuh kawncau simex aux ka piang naok tix mai deuh kawncau simex yum tix ka piang naok aux heue. ²¹ Yam kaoh aux khaing it tix ponngawb sonsang tawx kawncau simex tix peux, aux yaoh ka hoik yum nawh, viang mawh nan, yam jawg aux ti jhak ponngawb, kawncau an ang mawh kawncau simex pa keh aux heue." ²² Khaix an, sibun tang kaux an tix kaux ah nin "Ang mawh, kawncau ngie pa im ju in, mawh kawncau simex aux, kawncau simex pa yum an mawh kawncau simex maix" mai sibun sivoie an deeh ah nin, "Ang mawh, kawncau simex pa yum an mawh kawncau simex maix, kawncau simex pa im in mawh kawncau simex aux, " Awm an kiex thungthiang paox tix ka plak sivoie simiang heue. ²³ Simiang ah nin, sibun tix kaux ah nin, "Kawncau simex im in mawh

kawn aux, kawn simex pa yum an mawh kawn maix" mai sibun tang kaux ah nin, "Ang mawh, kawn simex pa yum an mawh kawn maix mai kawn simex pa im mawh kawn aux heue."²⁴ Khaix an, simiang ah nin, "Viex vaid hoek ka aux tix kre, " Mawh kheu nan, kix viex vaid tix kre hoek ka simiang heue.²⁵ Simiang ah nin, "Lug kawn ngie pa im an koe ra plak mai tawx ka sibun an kiex tix kaux tix plak heue."²⁶ Khaix an, mawh kheu kied cauxrhawm miex pa im kawn simex an ka kawn tix, kiex kraih ah nin ka simiang, "Simiang aux eue, tawx kawn pa im an ka kiex, paw doh pah kawn simex an liak!" Viang mawh nan, sibun tang kaux an pawk ah nin, "Paw kieh mawh cie aux mai paw kieh mawh cie maix, kieh goih heue."²⁷ Simiang deeh pawk lox nawh ah nin, "Tawx kawn pa im an ka sibun sivoe, paw doh pah kawn simex an, nawh mawh miex kawn ngie an tete heue."²⁸ Pui Isarelix khankix mhong grawng pa prawngca simiang, kix kied koe krax lhatgraung kah, mawh kheu yaox kix koe pingnya cuyi Siyix ka daux nawh, sonsang pon kuang nawh haktiex daux pa rahsee heue.

Grawng Kuang Sawlamon

4 Sawlamon mawh simiang ka piang pui Isarelix heue.² Inkix mawh pa kuang greem nawh pa mawh Azarix kawn simex Zadok cao giex kaing li,³ Elihawrap mai Ahiyax kawn simex Shisha mawh cao tiem lai, Yehoshaphat kawn simex Ahilut mawh cao kaing giex carang heue.⁴ Beneyax kawn simex Yehoyadax mawh cao kaing krungaing ting, Zadok mai Abiatha mawh cao giex kaing li,⁵ Azarix kawn simex Natan mawh cao kuang kaing lum, Zabuk kawn simex Natan mawh cao tawx krax keud mai mawh paux simiang heue.⁶ Ahisha mawh cao kuang nyiex haw mai Adawniram kawn simex Abada mawh cao kuang cub pui yuh kaing heue.⁷ Sawlamon deuh cao pa kuang piang haktiex pui Isarelix kao ra kaux pa sang tawx pa ih son simiang mai son pui pa ot daux nyiex haw nawh, daux tix num, tix khix tix kaux, mawh cao teei beeh glawm khrierien ceu pa ih heue.

4:21 Yam 15:18; 2Been 9:26.

⁸ In mawh ceukaux kix, kawn simex Hurax mawh cao kuang ka piang gawng Epharim,⁹ kawn simex Bendeka mawh cao kuang ka veng Makat, veng Shalabim, veng Bietshemiet mai veng Elonbiethanan khankix,¹⁰ kawn simex Abinadat mawh cao kuang ka veng Arubot mai veng Sawkhaw mai haktiex pa koe hawt veng Hepha khankix,¹¹ kawn simex Abinadat mawh cao kuang haktiex Dawrax khawmuik, nawh teei ti moeng kawn sibun Sawlamon pa kaux Taphat heue.¹² Banax kawn simex Ahilut mawh cao kuang veng Tanak, veng Megidaw mai veng Bashan khawmuik pa koe praok veng Zaretan pa koe greem veng Yezerelax khankix, jah ka veng Bietschan tom hoek ka veng Abelamehawlau tom hoek luank plak veng Yawkanam heue.¹³ Kawn simex Begebax mawh cao kuang ka veng Ramat pa koe ka daux haktiex Gilat mai dee ot doehru Manashe yaong Ya-irax pa koe ka daux haktiex Gilat mai veng Aragawbax pa koe ka haktiex Bashan mai khawm veng ting tixgliah veng, pa koe guh veng mai pa yuh jhong siviex veng ka tawng lheung khankix heue.¹⁴ Ahinadat kawn simex Idaw mawh cao kuang ka veng Mahanem,¹⁵ Ahima mawh cao kuang ka daux kien Napthalix, nawh kawx teei ti moeng Basemat kawn sibun Sawlamon,¹⁶ Banax kawn simex Hushie mawh cao kuang ka daux kien Asha mai veng Alot,¹⁷ Yehoshaphat kawn simex Parua mawh cao kuang ka daux kien Issakha,¹⁸ Shimix kawn simex Elax, mawh cao kuang ka daux kien Benjamin,¹⁹ Gebax kawn simex Urix mawh cao kuang tix kaux nongnong ka haktiex Gilat, meung cie simiang Sihong pui Amawrix mai cie Awgax simiang meung Bashan ankix heue.

Pingnya Sawlamon Haokhuan

²⁰ Pui Yudax mai pui Isarelix hoik kied haohhun awm mhaik praok rawm sigrit sigra, kix ih nyaux mai gauxrhawm heue.²¹ Sawlamon kuang haktiex khawmuik, jah ka rawm klawng Yufrethix tom hoek ka haktiex pui Philitix, tom hoek ka mee haktiex Ejiptux, kix viex teen hoek mai yuh kaing jhaw son Sawlamon, glang yam im ju nawh heue.²² Priex ih son daux nyiex haw Sawlamon tix ngaix uik phawng gaox nghox ca tixngoe kawrax mai phawng gaox nghox koitixgliah kawrax heue.²³ Mawie

eei pa kluing kao mu mai mawie blha tixnga mu mai yung tixyieh mu, lheu khaing an mawh cak, cak khai, kiah mai sim eei pa koe bee khankix heue. ²⁴ Mawh kheu hoik pon kuang nawh haktiex plak klip klawng ting Yufrethix khawmuik, jah ka veng Tiphasa tom hoek ka veng Gaza mai nawh hoik kuang ka piang simiang haktiex can pa koe ka plak klip klawng ting Yufrethix mai hoik kieh haktiex pa koe hawt vungviang nawh yiienyawg tix heue. ²⁵ Pui Yudax maipui Isarelay yaox ti ot yiienyawg ka greem veei nhu plix siiet mai greem veei khaox ruh cie tix, jah ka veng Dan tom hoek ka veng Berashebax, glang bawgyam kuang nawh haktiex heue. ²⁶ Sawlamon koe kawg brung pon mheen lhang, son linglawx naing nawh mai pui naing brung tix mheen ra rheng kaux heue. ²⁷ Cao kuang kao ra kaux hoik tang teei beeh glawm tix kaux tix khix mai khrierien pa ih son Sawlamon mai son pui pa ot dau nyiex haw khawmuik mai yaox ti khre grumnaog heue. ²⁸ Kix baox viex nghox koi mai son brung mai law kix viex rib kroh hoek kaux mawh kaux an, awm pa koe beeh glawm kix heue. ²⁹ Siyiex tawx pingnya cuyi ka Sawlamon mai rhawm pa viehva awm mhaik rawm sigrit sigra, ³⁰ mawh kheu nan, pingnya cuyi Sawlamon lheu khaing pingnya cuyi pui pa ot ka plak toh mai khaing pui pa koe pingnya cuyi pa ot ka dau meung Ejiptux heue. ³¹ Sawlamon nie lheu koe pingnya cuyi khaing pui khawmuik mai khaing Ethan pui Ezarahi mai Heman, Khalakhawla mai Narada kawn simex Mahawla khankix mai min ceukaux nawh hoik tah hu ka piang haktiex khawmuik heue. ³² Nawh ah lox kab loe rheng gum mai lairhax tix rheng phuan phuk heue. ³³ Nawh baox kraik grawng khaox khankix, jah ka khaox Arit pa koe ka haktiex Lebanon, tom hoek ka khaox taux imkrim pa kuah ka piang guh veng, nawh baox kraik grawng totiag kuceu mai grawng sim kuceu mai viag pa chix chuh chix mu mai grawng kax dau rawm khankix heue. ³⁴ Simiang pui ka

4:26 1Sim 10:26, 2Been 1:14, 9:25. 4:31 Yaog 89 Title. 4:32 Kab 1:1, 10:1, 25:1, Song 1:1. 5:5 2Sa 7:12-13, 1Been 17:11-12.

piang haktiex khawmuik pa hoik mhong ka grawng pingnya cuyi nawh khankix, hoek sonsang nghiet tix pingnya cuyi pa chix simiang Sawlamon heue.

5 *Khre Ti Sum Nyiex Buan* (2Been 2:1-18)

5 Yam mhong Hiram simiang veng Turux ka groi kix bee ka Sawlamon mai plud dee ot keeing tix, nawh ploi kawncau tix hu ka Sawlamon, mawh kheu Hiram mawh pui pa moh ka simiang Davit jheengjheeng heue. ² Sawlamon ploi pui tix hu ah nin ka Hiram, ³ maix tawng ka keeing aux Davit ang pon sum nyiex buan ka dau ceukaux Simiang Siyiex nawh yuh ka mawx, kheu yaox nawh ti puing naing kudah tom hoek bawgyam kieh Simiang Siyiex pui koeng nawh ot greem tiag caong nawh heue. ⁴ Yam in Simiang Siyiex kieh haktiex hawt vungviang an yiienyawg, mawh kheu ang pui koeng khei mai pui caoxcaig khankix lai koe heue. ⁵ Aux keud ti sang sum nyiex buan ka dau ceukaux Simiang Siyiex aux, awm pa hoik kraik Simiang Siyiex ka keeing aux Davit, kawn simex maix pa sang yaog aux mawh cao pa ngawm piang dangngeung maix mai pa sang plud maix an, nawh tak sum nyiex buan ka dau ceukaux Aux heue. ⁶ Mawh kheu nan, tawx lox ka kawncau maix sonsang kid kix khaox Arit son aux, khaing gawng Lebanon mai kawncau aux khankix tak teem kawncau maix mai aux tak tawx ngawh riang kawncau maix, maix tawng ang pui yix chix kid khaox awm pui Sidom heue. ⁷ Yam mhong Hiram ka lox Sawlamon, nawh kied koe krax gaurhawm ah nin, "Kieh krax pa yaogyaw buanson koe ka Simiang Siyiex ka dau in singaix, mawh kheu Nawh Cao hoik tawx kawn simex Davit pa koe pingnya cuyi tix kaux kuang ka piang pui ceu ting heue." ⁸ Khaix an, nawh ploi pui hu ah nin ka Sawlamon, "Aux hoik keud ti yaox lox pa tawm maix ka aux, aux tak tawx khaox Arit mai khaox gix awm pa lo maix heue. ⁹ Kawncau aux khankix tak teei khaox an lih khaing gawng Lebanon mai viex hoek krax rawm sigrit sigra, aux tak kieh kix sibloe khaox an ka piang kram dau rawm sigrit sigra mai viex hoek tan mai kix tak rieb

khaox ka dee an mai tak yaox ti tawx pa ih grumnaog ka son pui aux khankix, sonsang fahrhawm aux kah heue.”¹⁰ Hiram tawx khaox Arit mai khaox gix awm pa simie nawh ti lo heue.¹¹ Son priex pa sang ih pui Hiram tix num hoik tix num, Sawlamon tawx gaox nghox ca ra mheen kawrax mai bee pa hoik ciied singax tixnga kawrax heue.¹² Mawh kheu nan, Simiang Siyiex tawx pingnya cuyi ka Sawlamon awm pa hoik koe lox sijax mukheu Nawh Cao, son ang naing lai koe Hiram mai Sawlamon yuh sijax mukheu tau mai paox tix heue.¹³ Simiang Sawlamon laug pui pa sang yuh kaing ka daux pui Isarelaax mai pui pa hoik laug nawh koe loe mheen kaux heue.¹⁴ Nawh ploix kix lailoh ti ot ka gawng Lebanon, tix khix tix mheen kaux mai kix yaox ti ot piang gawng Lebanon tix khix mai kix yaox ti deeh ing ot ka daux nyiex tix ra khix mai Adawniram mawh cao kaing pa kuang ka pui yuh kaing heue.¹⁵ Pui pa cau Sawlamon kieh klawm khaox koe aliah mheen kaux mai pui pa kaong simaox ka piang gawng koe daix mheen kaux heue.¹⁶ Sawlamon kieh pui loe rheng loe yieh kaux mawh cao kaing pa bung ka piang pui pa yuh kaing khankix heue.¹⁷ Simiang tawx lox ka kix mai kieh kaong simaox ting mai simaox koe ngawh jum mai simaox pa hoik saik tix khankix hoek, sonsang kaw jaong num nyiex buan kah heue.¹⁸ Mawh kheu nan, cub cao chix sum pui Sawlamon mai cub cao chix sum pui Hiram tau mai pui Gebalax khrierien khaox mai simaox sonsang sum ka nyiex buan heue.

Sawlamon Sum Nyiex Buan Siyiex

(2*Been* 3:1-14)

6 Khaix hoik lih hu pui Isarelaax khaing meung Ejiptux pon yieh tixdaix num, yam kuang simiang Sawlamon ka piang pui Isarelaax pon num, ka daux khix Zepha khix ra, nawh jah ti sum nyiex buan Simiang Siyiex heue.² Nyiex buan pa sum simiang Sawlamon son Simiang Siyiex, krax lang tixgliah sawk, krax vieh tixnga sawk, krax lhaong tixngoe sawk heue.³ Sidub pa koe sivoie nyiex buan, **6:16** Lih 26:33-34. **6:22** Lih 30:1-3. **6:23-28** Lih 25:18-20.

plak lang tixnga sawk, plak vieh kao sawk, plak vieh an sidu mai nyiex buan heue.⁴ Nawh yuh siviex vawng sonsang riieng ka daux nyiex buan heue.⁵ Nawh sum lawg jawn hawt vungviang plak praix ding nyiex buan, hawt vungviang lawg pa singax singeh mai lawg pa plak jhi khawm ra dah, lawg jawn hoik rawb vungviang an heue.⁶ Lawg plak greem vieh phuan sawk, lawg sigreung vieh liah sawk mai lawg plak piang vieh aliah sawk, nawh yuh lat ngip paox ti hawt vungviang plak praix nyiex buan, son ang lat khankix chun tix laig ka ding nyiex buan heue.⁷ Yam sum ka nyiex buan, kix sum ka simaox pa saik pa hoik khre tix sivoie ang nyang viex hoek, mawh kheu nan, ang lai chix mhong lox daix, lox moe mai lox kraung rhiem yam sum ka nyiex buan heue.⁸ Krax laig ka lawg plak greem koe ka plak dawm nyiex buan, kix haok ka lawg sigreung ka bawng vawkvek, khaing lawg sigreung haok ka lawg plak piang glawk loe heue.⁹ Khaix hoik sum nawh nyiex buan, nawh lhop rong mai nukka phia khaox Arit heue.¹⁰ Nawh sum lawg rawb vungviang nyiex buan lhaong phuan sawk mai lawg an sitoie tix mai nyiex buan ka lat khaox Arit heue.¹¹ Gumlox Simiang Siyiex hoek ka simiang Sawlamon ah nin,¹² Pa dex mai nyiex buan sum maix in, phan maix hawt lox been prawngsee Aux mai nghiet lox tat jhawm prawng Aux mai priex ka lox tawm pingnyap Aux mai hawt yuh ceu an khawmuik, Aux tak kieh gumlox pa hoik krai Aux ka keeing maix Davit kauxcong mai maix heue.¹³ Aux tak ot sinax pui Isarelaax mai ang tikvud ka pui Aux Isarelaax heue.”¹⁴ Simiang Sawlamon hoik sum nyiex buan tom grumnaog heue.¹⁵ Nawh tawb ding plak daux khankix ka phia khaox Arit, jah khaing phia tawm daux nyiex buan tom hoek ka braux plak daux yuh tix ka khaox Arit mai tawm bing nyiex buan ka phia khaox gix pa pu heue.¹⁶ Nawh yuh lawg dee pa kied singax singeh, krax lang krax vieh tixnga sawkawm paox, ka plak khaix daux nyiex buan ka phia khaox Arit heue.¹⁷ Lawg pa koe daux nyiex buan, sivoie ngai dee pa kied singax plak lang koe tixpon sawk heue.¹⁸ Plak daux nyiex buan koe

khaox Arit pa hoik bre tix saik awm tux tai mai rieang tai pa hoik pruh pa yuh tix ka khaox Arit, ka ding an ang lai chix yaox ka simaox heue. ¹⁹ Nawh khrierien dee pa kied singax singeh daux nyiex buan sonsang deuh teug sijax mukheu Simiang Siyiex tan heue. ²⁰ Krax lang lawg dee pa kied singax singeh koe tixnga sawk, plak vieh tixnga sawk mai plak lhaong tixnga sawk, nawh om an ka khri nawnaw mai yuh khu dee tan ka khaox Arit heue. ²¹ Simiang Sawlamon om plak daux nyiex buan ka khri nawnaw, nawh takteue soi khri ka sivoe ngai dee pa kied singax an mai om an ka khri heue. ²² Nawh om nyiex buan ka khri tom sidah hoik sum ka nyiex buan heue. Mai baox om khu dee tan mai lawg dee pa kied singax singeh ka khri heue. ²³ Nawh yuh rieang Cherubin ra mu pa lhaong kao sawk ka khaox sanlun ka dee pa kied singax singeh heue. ²⁴ Pruik Cherubin an tix plak koe phuan sawk mai plak an tix plak koe phuan sawk, mawh kheu nan jah ka toh pruiik plak in tom hoek plak an lang kao sawk heue. ²⁵ Rieang Cherubin tang mu hoik koe kao sawk, Cherubin an khawm ra mawh pa sidu awm paox tix heue. ²⁶ Krax lhaong rieang Cherubin an tix mu koe kao sawk mai an tang mu kawx sidu awm paox tix heue. ²⁷ Nawh deuh rieang Cherubin khankix ka daux lawg pa kied singax mai toh pruiik Cherubin an di ti lih mai pruiik Cherubin an tix mu cux ka ding plak in mai toh pruiik Cherubin tang mu an cux ka ding plak an mai pruiik ankiex khawm ra hoik cux paoxti, tix mutix plak ka daux sigreung lawg an heue. ²⁸ Nawh om rieang Cherubin ankix ka khri heue. ²⁹ Nawh saik rieang Cherubin ka khaox jhie yaong mai saik pruh tai hawt vungviang plak praix plak daux nyiex buan heue. ³⁰ Nawh om phia tawm nyiex buan ka khri khawm plak daux plak praix heue. ³¹ Son krax laig ka dee pa kied singax singeh nawh yuh siviex ka khaox sanlun, plah phia siviex mai pang siviex khankix koe phuan son tix son khaing ding heue. ³² Nawh yuh siviex ra mu ka khaox sanlun mai saik rieang Cherubin mai rieang pruh tai khaox jhie yaong

khankix ka piang siviex mai om ankix ka khri mai baox phruah khri ka piang rieang Cherubin mai ka khaox jhie yaong heue. ³³ Son pang siviex laig ka daux, nawh yuh ka khaox sanlun, pa vieh khaing ding pon son tix son heue. ³⁴ Siviex an ra mu yuh tix ka khaox gix mai plah siviex an ra mu chix niiep ti mawh tix mu mai plah siviex pa deuk an ra mu kawx chix niiep ti awm an heue. ³⁵ Nawh saik rieang Cherubin mai rieang pruh tai khaox jhie yaong ka piang ceu an khankix mai nawh om an khankix ka khri mai nawh baox om khri ka piang rhoi saik khankix heue. ³⁶ Nawh hoik kaw jaong ding ka simaox pa hoik saik tix loe thaix mai jaong ding khankix ka phia khaox Arit tix thaix heue. ³⁷ Ka daux pon num tix num khix Zipha khix ra, kix jah tix kaw jaong num nyiex buan Simiang Siyiex heue. ³⁸ Nyiex buan hoik sum khawmuik ka daux kao tix num daux khix Bulax khix daix mai uik hoik awm pa bak kix heue. Kix sum nyiex buan an aliah num heue.

7 Nyiex Tang Nyiex Pa Sum Sawlamon

7 Sawlamon sum nyiex haw tix kao loe num mai nawh hoik kied grumnaog khawmuik heue. ² Nawh sum nyiex haw ka khaox daux nong gawng Lebanon, krax lang tixyieh sawk, krax vieh tixphuan sawk mai krax lhaong tixngoe sawk tau mai rong pon tia mai kab lat ka piang rong heue. ³ Nawh yuh braux ka phia khaox Arit, lawg plak piang pa koe ka piang rong tixpon phuan lawg, tix tia koe kao phuan lawg heue. ⁴ Siviex vawng koe loe tia mai siviex vawng an hoik ralai see ka paox tix heue. ⁵ Pang siviex mai pang siviex vawng khankix mawh pakpeung pon daog mai siviex vawng loe tia ralai see ka paox tix heue. ⁶ Nawh sum nyiex kum pa grumnaog mai rong khankix koe krax lang tixphuan sawk mai krax vieh tixngoe sawk, koe sidub ka plak siviex vawng an loe tia tau mai rong khawm glawk bawng heue. ⁷ Nawh yuh nyiex kum dangngeung pa mawh dee prawngsee, nawh tawm an ka phia khaox Arit, jah ka bing nyiex tom hoek ka braux plak daux heue. ⁸ Nyiex haw ot nawh koe plak khaix nyiex kum, rhoi khaix taix pa yuh kix awm paox tix mai nawh baox yuh nyiex tix

lhang pa awm nyiex kum dee prawngee, son kawn sibun Pharaw pa mawh moeng nawh heue. ⁹ An khawmuik sang tix ka simaox pa koe ngawh mai saik situ awm paox tix mai rid plak khaix mai sivoe ka jhi, jah khaing plak jaong tom hoek plak piang mai baox sang simaox jah ka plak praix tom hoek ka brawk ting heue. ¹⁰ Jaong num an sang tix ka simaox pa kied ting pa koe ngawh jum mai simaox an tixblah lang kao sawk, tixblah lang daix sawk heue. ¹¹ Ka piang an mawh simaox pa koe ngawh jum pa hoik saik tix sidu awm paox tix ka khaox Arit heue. ¹² Nawh vie vungviang brawk nyiex haw ka simaox pa hoik saik tix loe tia mai ka khaox Arit tix tia, plak daux brawk nyiex buan mai sidub nyiex buan kawx vie ti awm an heue.

Kaing Jhaw Yuh Hiram (2Been 2:13-14, 3:15-17)

¹³ Simiang Sawlamon ploi pui hu kok ka Hiram khaing Turux heue. ¹⁴ Nawh mawh kawn simex miexmai pui Napthalix mai keeing nawh mawh pui veng Turux cao yuh kaing kraung tawng lheung, nawh grumnaog ka pingnya cuyi mai krax tawng krax yung mai min ka kaing kraung tawng lheung heue. Nawh hoek ka simiang Sawlamon mai yuh kaing son nawh khawmuik heue. ¹⁵ Nawh raug rong tawng ra mu, rong tix mu lhaong kao daix sawk, plak ting kao ra sawk heue. ¹⁶ Nawh baox raug kaing rong ra mu ka tawng sonsang sau ka piang toh rong, krax lhaong kaing rong tix mu koe phuan sawk mai tang mu kawx koe phuan sawk heue. ¹⁷ Nawh yuh ngai rub tawng mai maox ceng tawng mai lhop ngai rub tawng aliah mu ka piang choek rong tix mu ka ku mu rong heue. ¹⁸ Nawh yuh rieang plix kla cang mai sau ka piang ngai rub ra tia vungviang kaing rong khankix, sonsang tawb ka piang kaing rong pa koe ka piang toh rong khankix mai ka kaing rong pa kawn deuk an tix mu kawx yuh awm an heue. ¹⁹ Kaing rong pa koe piang toh rong sidub khankix mawh pruh tai kraox nhawng pa koe pon sawk heue. ²⁰ Nawh sau plix kla cang khankix ka piang kaing rong pa koe piang toh rong an ra mu, hawt dee peem rong dex dee koe ngai rub hawt vungviang dee koe rieang plixkla cangratia, khawm ra tia koe ra yieh

mu heue. ²¹ Nawh sum rong sidub nyiex buan mai jung rong tix mu ka plak dawm, kok an mawh Yakhin mai baox jung rong tix mu ka plak goix mai kok an mawh Bawzax heue. ²² Toh kaing rong koe pruh tai kraox nhawng ka heue. Kaing pa yuh rong khankix hoik sidah heue.

Kraung Khrai Son Nyiex Buan (2Been 4:2-5)

²³ Nawh baox raug dung rawm tawng lheung laklo, krax vieh kao sawk, lhaong phuan sawk mai hawt vungviang moing koe tixngoe sawk heue. ²⁴ Hawt greem praok moing hoik yuh ti sau rieang loi plix singiien hawt vungviang moing tix sawk kao mu, rieang loi plix singiien an ra tia hoik raug tix tau ka moing dung rawm heue. ²⁵ Deuh dung rawm an ka piang rieang mawie kao ra mu, rieang mawie an loe mu veeh ngai tix plak blaong, loe mu veeh ngai tix plak klip, loe mu veeh ngaix tix plak jee mai an loe mu veeh ngai tix ka plak toh mai deuh dung rawm an ka piang rieang mawie khankix mai kieh mawie khankix vai kre tix ka plak daux heue. ²⁶ Krax pu dung rawm an, koe tix tiag taix mai moing awm pakpeung moing klong mai awm pruh tai kraox nhawng mai pon sau rawm ka daux an ra rheng pung heue. ²⁷ Nawh yuh khaox ngawm tawng lheung kao mu, lang pon sawk, vieh pon sawk, lhaong loe sawk heue. ²⁸ Nawh yuh pakpeung khaox ngawm awm in, vungviang daog khaox ngawm an koe daux pa sang sau lat rhiem kah heue. ²⁹ Ka piang dee sau lat an koe rieang sivai sangsi, rieang mawie, rieang Cherubin kah heue. Ka piang daog khaox ngawm an koe khaox tang tix mu, ka plak greem rieang sivai sangsi, koe mawie mai rieang pruh tai kah heue. ³⁰ Khaox ngawm tix mu koe jaong lawx tawng lheung pon mu mai khawm gawng lat tawng kah mai khawm pon daog koe khaox tang pa sang deuh pan kah heue. Dang pa deuh pan hoik raug tix kab ka khaox ngawm an mai koe rieang pruh tai ka ku mu heue. ³¹ Moing ang pa ting an vieh tix sawk mai laklo daux mai pakpeung awm khaox ngawm, lang tix sawk mai tix diex mai ka piang praok moing khankix mawh pa bre tix saik, khaox tang pa deuh pan an koe pakpeung pon daog mai ang

laklo daux heue. ³² Greem lat khankix koe jaong lawx pon mu, gawng lat lawx an hoik kleuk tix mai khaox ngawm, krax lhaong jaong lawx ku mu koe tix sawk mai tix diex heue. ³³ Jaong lawx an khankix yuh awm pakpeung jaong linglawx naing brung, gawng lat, jim, plawng mawng mai khawm gawng joh khawmuik mawh pa raug tix heue. ³⁴ Khaox ngawm an tix mu koe caong pa joh ka pon daog, caong an mawh pa raug tix kab mai khaox ngawm heue. ³⁵ Ka piang caong khaox ngawm an sau kangkaw laklo pa koe tix diex kah, caong mai lat khankix kawx hoik mawh pa raug kleuk tix tau mai toh khaox ngawm an heue. ³⁶ Ka piang pakngai khaox tang mai phia tawm khankix hoik saik rieang Cherubin mai sivai sangsi mai khaox jhie yaong tau mai rieang pruh tai hawt vungviang heue. ³⁷ Nawh yuh khaox ngawm pa awm paox tix kao mu an khawmuik hoik raug awm paox tix, diang mai pakpeung kawx awm paox tix heue. ³⁸ Nawh yuh pan ting kao mu ka tawng, pan ting an tix mu hoik kub sau rawm daux tixpon pung mai pan ting an vieh pon sawk, ka piang khaox ngawm kao mu nawh deuh pan ting ka piang ku mu heue. ³⁹ Nawh deuh khaox ngawm plak dawm nyiex buan phuan mu, plak goix phuan mu mai deuh dung rawm plak dawm nyiex buan plak toh jee heue.

Kraung Shiao Son Nyiex Buan

⁴⁰ Hiram hoik yuh aw, bug rawm mai pan khoeok khankix mai nawh hoik yuh kaing son simiang Sawlamon mai nyiex buan Simiang Siyiex heue. ⁴¹ Ceu pa hoik yuh nawh khankix mawh rong ting ra mu toh peem kaing rong ra mu mai ngai rub pa tawb piang toh rong an ra pheem ⁴² mai rieang plix kla cang khankix pon yieh mu, pa sau ka piang ngai rub an ra pheem, tix pheem ra tia ka piang ngai rub pa sang tawb ka piang toh peem kaing rong an khawm ra heue. ⁴³ Khaox ngawm kao mu mai pan ting kao mu, pa koe ka piang khaox ngawm khankix, ⁴⁴ dung rawm tix mu mai rieang mawie kao ra mu, pa koe plak greem dung rawm an ⁴⁵ mai aw,
7:38 Lih 30:17-21. 7:48 Lih 30:1-3. 7:51 2Sa 8:11, 1Been 18:11. 8:1 2Sa 6:12-16, 1Been 15:25-29.

bug rawm mai pan khoeok khankix mai kraung ceu in khawmuik hoik mawh pa kieh simiang Sawlamon Hiram yuh son nyiex buan Simiang Siyiex, pa hoik raug tix ka tawng lheung heue. ⁴⁶ Simiang hoik kieh kix raug ceu inkix ka dee koe tiex klox ka daux lung Yawdan sinax veng Sukot mai veng Zaretan heue. ⁴⁷ Sawlamon ang lai ciang tix yaox ka kraung an khankix kheu hoik kied nie, krax ciien tawng lheung ang lai dak uik tawng ka heue. ⁴⁸ Sawlamon yuh kraung shiao ka daux nyiex buan Simiang Siyiex khawmuik pa mawh khu khri dee tan mai pheem khri son pa khan blah plak sivoe Nawh Cao ⁴⁹ mai jawk ten khri nawnaw pa koe plak dawm phuan mu mai plak goix phuan mu ka plak sivoe dee pa kied singax tau mai rieang pruh tai, kaww ngu khawm sigiiep ngu khri, ⁵⁰ kaww, pan khoeok, cawn mai pan pa yuh ka khri nawnaw mai jhong siviex khri son siviex ting pa koe ka daux lawg plak daux dee pa kied singax mai son siviex laig daux lawg ting bang kum pa koe ka daux nyiex buan heue. ⁵¹ Khaix hoik yuh simiang Sawlamon kaing jhaw khawmuik ka son nyiex buan Simiang Siyiex, nawh viex pa hoik appong keeing nawh Davit ti tan pa mawh mau, khri mai kraung khrai pa shiao khawmuik hoek daux nyiex buan mai sau ka daux krao sinngao nyiex buan Simiang Siyiex heue.

Teug Sijax Mukheu Laig Daux Nyiex Buan

(2Been 5:2-14)

8 Simiang Sawlamon khrawm kuad riex ju pui Isarelaix mai cub cao kaing ru ceu pui khawmuik mai cao kaing keeing nyiexma pui Isarelaix khankix hoek ka tix, ka daux veng Yerusalieem sonsang viex teug buan sijax mukheu Simiang Siyiex khaing veng Davit pa mawh Zion heue. ² Pui Isarelaix khawmuik khrawm paox tix hoek ka simiang Sawlamon daux bawgyam pawie daux khix Etanim khix aliah heue. ³ Kuad riex ju pui Isarelaix khawmuik hoek mai cao giex kaing li khankix teei ti klawm teug sijax mukheu Simiang Siyiex heue. ⁴ Kix viex teug buan sijax mukheu Simiang Siyiex hoek ka daux nyiex gox buan man bang kum mai kix viex kraung shiao pa singax hoek ka daux nyiex gox buan man, cao

giex kaing li mai pui Lewix khankix mawh cao pa viex hoek heue. ⁵ Simiang Sawlamon mai pui hun Isarelaux khrawm tix hoek ka plak sivoe teug sijax mukheu mai kix tan yung, mawie khankix tom ang lai uik simin heue. ⁶ Cao giex kaing li khankix viex teug buan sijax mukheu Simiang Siyiex laig ka dee ot nawh ka daux nyiex buan ka dee pa kied singax mai kix deuh teug buan sijax mukheu an ka greem pruiik Cherubin khankix heue. ⁷ Cherubin an khankix di pruiik tix ka piang teug sijax mukheu mai Cherubin an khankix tawb ka piang teug sijax mukheu mai khawm ka piang khaox glawm nawh heue. ⁸ Khaox glawm an kied lang mai pon yaox toh khaox glawm an khaing dee pa kied singax ka sivoe lawg dee pa singax, viang mawh nan ang chix yaox ka plak praix mai an koe tan tom in singaix heue. ⁹ Ang koe tittix daux teug sijax mukheu, lheu khaing khlawp simaiox an ra khlawp pa sau Mose tix priex yam ot ka baoh Hawrap, yam yuh Simiang Siyiex lox sijax mukheu tau mai pui Isarelaux, yam lih kix khaing meung Ejiptux heue. ¹⁰ Khaix hoik lih cao giex kaing li khankix khaing ka dee pa singax singeh, paiawm naog ka daux nyiex buan Simiang Siyiex heue. ¹¹ Kheu jao hoik ceep paiawm mai naog min siawp sibrawm Simiang Siyiex ka daux nyiex buan, cao giex kaing li ang lai pon cung ti yuh kaing jhaw heue.

Krax Appong Nyiex Buan (2Been 6:3-11)

¹² Sawlamon ah nin, "Simiang Siyiex hoik kraik ti deuh, Nawh Cao tak sang ot ka daux paiawm pa faik heue. ¹³ Aux hoik sum nyiex buan ka son Maix Cao sonsang ot Maix Cao ka daux leeingu heue." ¹⁴ Yam cung pui hun Isarelaux, simiang veeh ngai tix mai nawb buan ka piangkix heue. ¹⁵ Nawh ah nin, "Kieh Simiang Siyiex pui Isarelaux koe buanson, pa hoik yuh Nawh Cao grumnaog ka taix Tix, awm hoik koe lox mukheu Nawh ka keeing aux Davit ka jheeh tix, ¹⁶ jah ka singaix hoik viex Aux pui Isarelaux lih khaing meung Ejiptux, Aux ang nyang bax laug veng tix veng kawx, khaing 8:9 Pi 10:5. 8:10-11 Lih 40:34-35. 8:16 2Sa 7:4-11, 1Been 17:3-10. 8:17-18 2Sa 7:1-3, 1Been 17:1-2. 8:19 2Sa 7:12-13; 1Been 17:11-12. 8:25 1Sim 2:4.

doehru pui Isarelaux sonsang sum ka nyiex buan, sonsang ot min ceukaux Aux tan, viang mawh nan Aux hoik laug Davit, sonsang kuang ka pui Aux Isarelaux heue. ¹⁷ Grawng ceu an hoik mawh pa koe ka daux rhawm rhi keeing aux Davit, sonsang sum nawh nyiex buan ka son min ceukaux Simiang Siyiex, Siyiex pui Isarelaux heue. ¹⁸ Viang mawh nan, Simiang Siyiex ah nin ka keeing aux Davit, awm hoik koe rhawm rhi maix ti sang sum nyiex buan ka son min ceukaux Aux, maix hoik yuh ceu pa mhawm pa koe ka daux rhawm rhi tix. ¹⁹ Viang yuh ka mawx kawx maix tak ang pon ti sum nyiex buan, tak mawh kawm simex lih maix pa sum nyiex buan son min ceukaux Aux heue. ²⁰ Simiang Siyiex hoik yuh grumnaog awm gumlox pa hoik kraik Nawh Cao ti deuh mai kieh aux plud dee ot keeing aux Davit mai hoik kieh aux ngawm ka piang danggeung pui Isarelaux awm lox mukheu hoik yuh Simiang Siyiex mai aux hoik sum nyiex buan son min ceukaux Simiang Siyiex, Siyiex pui Isarelaux heue. ²¹ Aux hoik khre dahdee tix dah, son teug sijax mukheu awm pa hoik koe lox mukheu Siyiex ka daux pa hoik yuh Nawh Cao sijax mukheu tau mai taxdu ex, yam viex Nawh Cao kix lih khaing meung Ejiptux heue."

Buan Rawg Sawlamon

²² Sawlamon cung ka plak sivoe khu dee tan Simiang Siyiex mai ka plak sivoe pui hun Isarelaux mai nawh yaog taix tix khawm ra khawn ka raoma, ²³ ah nin, "Simiang Siyiex pui Isarelaux eue, ka daux raoma long mai ka piang haktiex in greem raoma, Siyiex pa awm Maix ang lai koe tix kaux kawx mai pa priex rien lox sijax mukheu mai jhi krax pa cauxrhawm tix ka kawncaw Maix Cao pa hawt grawng lawng khaix Maix Cao khawm rhawmrhi tix ka plak sivoe Maix Cao heue. ²⁴ Maix Cao hoik priex gumlox sijax mukheu pa hoik yuh tix ka kawncaw Maix keeing aux Davit, Maix Cao hoik yuh ceu an grumnaog ka taix Tix heue. Awm mukheu pa kraik Maix ka jheeh tix, awm pa koe daux in singaix heue. ²⁵ Simiang Siyiex pui Isarelaux eue,

yam in priex rien ka lox sijax mukheu pa hoik yuh Maix Cao ka kawncau tix keeing aux Davit mai pa hoik ah Maix Cao nin, phan kawn praix maix khankix chix yuh satix tix mai lawng hu plak sivoie Aux, awm lawng maix sivoie Aux, ru maix tak ang jud khaing ka piang dangneung pui Isarelaux khankix heue. ²⁶O Siyiey pui Isarelaux eue, kieh gumlox mukheu pa yuh Maix Cao grumnaog ka kawncau Maix pa mawh keeing aux Davit liak. ²⁷Viang mawh nan, mawh sang ot Siyiey ka piang haktiex tete lie? Jhak heue, raoma mai raoma pa kied lhaong ang lai kub dee ot son Maix Cao, nyiey buan pa hoik sum aux in, Maix Cao nie sang chix ot ka yuh ka mawx? ²⁸Simiang Siyiey eue, dohkeud ka lox rawg kawncau Maix buan mai nghiet ka lox khiokkhaw kokyo aux kawncau Maix ka plak sivoie Maix Cao daux in singaix, ²⁹Maix Cao jhak ka nyiey buan in ku ngaix ku bo ka dahdee pa hoik ah Maix Cao nin, min ceukaux Aux tak koe tan, yam veeh aux ngai tix plak nyiey buan mai rawgbuan, nghiet ka lox rawg kawncau Maix buan liak. ³⁰Nghiet ka lox khiokkhaw kawncau Maix Cao mai pui Maix Isarelaux yam hoek rawg kix buan ka dee in, nghiet ka lox rawg kix buan khaing raoma ka dee ot Maix Cao liak, yam mhong Maix ka lox kix, pluatploi phimap kix liak. ³¹Yam lud pui tix kaux kaux ka paox plawg tix mai khin ti kieh nawh tiextu mai kix tak hoek ti tiextu ka plak sivoie khu dee tan Maix ka daux nyiey buan in, ³²Maix Cao nghiet khaing daux raoma mai prawngca ka kawncau Maix khankix, ciyang ka pa yuh pa caoxcaig mai kieh pa caox yuh nawh deeh hoek ka piang kaing nawh mai prawngca pui rahsee ka daux pa rahsee mai deeh tawx buanson ka pa rahsee yuh nawh heue. ³³Yam som pui Maix Isarelaux ka sivoie pui koeng tix, kheu koe phimap tiehfeen kix ka Maix Cao, yam veeh kix ti hoek ka Maix, phan kix rieb ka ceukaux Maix mai rawgbuan khiokkhaw ka Maix ka daux nyiey buan in, ³⁴ nghiet khaing daux raoma mai pluatploi phimap pui Maix Isarelaux mai deeh viex kix

8:27 2Been 2:6. **8:29** Pi 12:11.

hoek ka haktiex pa hoik tawx Maix Cao ka taxdu kix heue. ³⁵Yam caox praix ang lhiex lih kheu jao phimap lud kix ka Maix Cao, yam deeh hoek kix ti rawgbuan ka dee in, phan kix rieb ka min ceukaux Maix Cao mai deeh veeh ti khaing phimap tix, yam ciyang Maix Cao ka kix, ³⁶Maix Cao nghiet khaing daux raoma mai pluatploi phimap kawncau Maix pui Isarelaux mai sonsang lawng hu kix dauxkrax pa rhawm mai deeh kieh lhiex lih ka piang haktiex, pa hoik tawx ka ceu pui Maix pa mawh sinngao pa pon kix heue. ³⁷Yam sibhawm praix ka piang haktiex angah, jhawm saux preng angah, jhawm saux muad angah mai yam yum khaox ox ka bhaung pa siaoh mai khaox yum kheu jah rawm ti lih khaing angah, yam lih sido ti yuh ma koi laux angah mai yam hoek pui koeng ti lailawm ka veng kix angah mai khawm jhawm saux ceu pa yuh ka mawx angah, ³⁸ pui Maix Isarelaux tix kaux kaux yam hoik tawng nawh ka krax ciyang pa hoek ka piang tix ka daux rhawm nawh mai phan nawh hoik yaog taix tix rawgbuan khiokkhaw ka ceu patix angah, ka daux nyiey buan in, ³⁹ nghiet khaing daux raoma ka dee ot Maix Cao mai pluatploi phimap kix mai yuh mai tawx ka pui kukaux, ka pui patawng Maix Cao rhawm nawh, mawh kheu Maix Cao tix kaux khaing pa tawng rhawm kawm pui khawmuik, ⁴⁰ sonsang lhatgraung kix ka Maix Cao, glang singaix im ju kix ka daux haktiex pa hoik tawx Maix Cao ka taxdu ex heue. ⁴¹ Awm an, son pui tang ceu, pa ang mawh pui Isarelaux pui Maix Cao kawx, pa hoek khaing haktiex dee singai son min ceukaux Maix Cao, ⁴² kheu kix tak mhong min ceukaux pa ting lhaong Maix Cao mai ka riang rao taix Maix Cao mai plawng taix pa nyeu Maix Cao lih, yam hoek kix ti rawgbuan daux nyiey buan in, ⁴³ nghiet khaing daux raoma ka dee ot Maix, yuh awm can pa rawg pui tang ceu ka Maix sonsang tawng pui haktiex khawmuik ka ceukaux Maix mai lhatgraung ka Maix, awm pa yuh Maix ka pui Isarelaux khankix mai sonsang tawng kix ka nyiey buan pa sum aux in mawh dee pa kok ka min ceukaux Maix heue. ⁴⁴Yam ploi Maix ceu pui tix khankix hu

puing ka pui koeng khankix ka dee mawx angah, yam rawg kix buan ka Simiang Siyiex, kix tak veeh ngai tix plaksee vengpa hoik laug Maix ka nyiex buan pa hoik sum aux ka son ceukaux Maix,⁴⁵ Maix nghiet ka lox pa rawg kix buan mai lox pa khioxkhaw kix khaing daux raoma mai caux rhawm ka kix liak.⁴⁶ Yam lud kix ka Maix, ang koe pui pa ang lud tix kaux kawx, yam songrhawm Maix ka kix mai ap kix ka pui koeng khankix mai kix mawh pui pa giexlaung ka haktiex pui koeng, viang singai angah, dex angah,⁴⁷ yam hoek kix ka haktiex dee mawh kix pa giexlaung, phan kix dohkeud ka pa lud daux rhawm tix mai deeh khioxkhaw ka Maix ka daux haktiex pa viex kix mawh pa giexlaung, ah nin, yix hoik lud mai hoik yuh pa caoxcaig mai pa ang rahsee,⁴⁸ yam veeh kix ti hoek ka Maix khawm rhawm tix, ka daux haktiex pui koeng pa giexlaung kix mai rawgbuan ka Maix ka plak see haktiex kix pa hoik tawx Maix ka taxdu kix mai ka veng pa laug Maix, ka nyiex buan pa hoik sum aux son ceukaux Maix,⁴⁹ nghiet khaing daux raoma ka dee ot Maix mai nghiet ka lox rawg kix buan mai lox pa khioxkhaw kix mai cauxrhawm ka kix liak!⁵⁰ Pluatploi phimap pui Maix khankix pa koe phimap krax lud ka Maix mai khawm pa ludloe kix, pa hoik lud kix ka Maix mai deeh cauxrhawm ka kix ka plak sivoie pui pa viex kix mawh pui pa giexlaung, sonsang koe krax cauxrhawm pui ankix ka piang kix,⁵¹ kheu jao mawh kix pui Maix mai sinngao Maix, pui pa hoik viex Maix lih khaing meung Ejiptux mai khaing ka dauxglah ngurhiem,⁵² kieh ngai Maix jhak ka kawncau tix mai nghiet ka canceu pa khioxkhaw pui Maix Isarelaux ka Maix heue.⁵³ Simiang Siyiex eue, mawh kheu hoik tangtiaha Maix kix khaing sinax ceu pui pa ot ka piang ca haktiex in khawmuik, sonsang mawh kix sinngao Maix, awm pa hoik kraih Maix ka kawncau Maix Mose yam viex Maix taxdu ex lih khaing meung Ejiptux heue.”

Sawlamon Nawb Buan Ka Pui Hun

⁵⁴ Yam hoik naox Sawlamon ka krax rawg tix buan mai krax pa khioxkhaw tix ka Simiang

8:56 Pi 12:10, Yaw 21:44-45.

Siyiex, nawh yaog ti kaoh khaing ka plak sivoie khu dee tan Simiang Siyiex, khaing pa gruxngawng mai yaog taix tix ka raoma,⁵⁵ nawh cung mai nawb buan ka pui Isarelaux ka lox pa kied ting ah nin,⁵⁶ “Kieh Simiang Siyiex koe buanson pa tawx krax pa nhim ka pui Nawh Isarelaux, awm pa hoik yuh Nawh lox mukheu, lox mukheu mhawm yuh Nawh tau mai kawncau Nawh Cao Mose, ang lai cod tix gum kawx heue.⁵⁷ Kieh Simiang Siyiex ex ot tau mai ex, awm ot Nawh Cao tau mai taxdu ex, paw kieh Nawh Cao tikvud ka ex mai prah ka ex,⁵⁸ sonsang kieh Nawh Cao rhawm ex deeh veeh ti hoek ka Nawh Cao mai sonsang pon hu ex ka daux krax Nawh Cao mai priex gumlox pingnyap Nawh khankix mai lox been prawngsee Nawh Cao khawm lox tat jhawm prawng pa tawm Nawh ka taxdu ex khankix heue.⁵⁹ Kieh gumlox pa khioxkhaw aux ka plak sivoie Simiang Siyiex, mawh pa dex mai Simiang Siyiex, Siyiex ex ku singaix, sonsang cauxrhawm Nawh ka kawncau Tix mai ka pui Nawh Isarelaux khankix, awm pa lo kix ku singaix⁶⁰ mai sonsang pon tawng pui piang haktiex khawmuik ka mawh Nawh Cao Simiang Siyiex, Siyiex tix kaux khaing heue.⁶¹ Kieh rhawmrhi pex mawh pa kaux sijax ka Simiang Siyiex ex mai hawt hu ka daux lox tat jhawm prawng Nawh Cao mai priex ka gumlox pingnyap Nawh Cao awm pa hoik koe ka daux in singaix heue.”

Sawlamon Ap Nyiex Buan

⁶² Simiang mai pui Isarelaux khankix tan krax tan pa appong ka plak sivoie ngai Simiang Siyiex heue.⁶³ Sawlamon yuh krax tan pa nhim ka mawie ra mheen ra rheng mu mai yung tix sien ra mheen mu ka Simiang Siyiex heue. Mai ap nyiex buan ka Simiang Siyiex heue.⁶⁴ Ka daux singaix an simiang appong lawg daux sigreung pa koe sivoie nyiex buan Simiang Siyiex mawh pa singax singeh mai simiang tan krax tan pa gleeing mai krax tan ceu pa ih mai khawm khlawp bee krax tan pa nhim, mawh kheu iak khu dee tan tawng lheung pa koe ka plak sivoie Simiang Siyiex ang kub deuh krax tan pa gleeing, krax tan ceu pa ih mai khlawp bee krax pa nhim khankix

ka piang an heue. ⁶⁵ Yam an Sawlamon khankheu pawie ting ka pui Isarela pa kied haohhun pa hoek jah khaing dee laig ka veng Hamat tom hoek ka rawm klawng iak Ejiptux pa hoek ka pawie plak sivoie Simiang Siyiex ex aliah ngaix ra bawg khawmuik kao pon ngaix heue. ⁶⁶ Yam hoek daux daix ngaix, nawh ploi pui khankix deeh ing mai kix nawb buan ka simiang mai tang ing ka nyiex tix ka daux pa nyawmrhawm mai ka daux pa gauxrhawm tix son krax pa mhawm pa yuh Simiang Siyiex ka kawncaw Nawh simiang Davit mai ka pui Nawh Isarela khawmuik heue.

9 Siyiex Jhi Tokaux Tix *(2Been 7:11-22)*

9 Khaix hoik sum Sawlamon ka nyiex buan Simiang Siyiex mai nyiex haw ot tix awm pa koe rhawm nawh ti sang yuh khawmuik, ² Simiang Siyiex deeh jhi tokaux Tix ka Sawlamon ra bawg tix bawg, awm jhi Nawh tokaux Tix ka nawh daux veng Gibon heue. ³ Simiang Siyiex ah nin ka nawh, "Aux mhong lox rawg maix buan mai lox pa khioxkhaw maix khankix pa hoik yuh maix ka plak sivoie Aux, Aux yuh nyiex pa hoik sum maix ka min ceukaux Aux singax singeh leeingju, ngai Aux mai rhawm Aux tak koe tan jheengjheeng heue. ⁴ Phan maix lawng hu ka plak sivoie Aux, awm hu keeing maix Davit khawm rhawm tix mai hawt yuh awm pa tawm Aux ka maix mai phan maix priex ti hawt lox been prawngsee pa deuh Aux mai lox tat jhawm prawng Aux khankix, ⁵ Aux tak kieh danggeung haktiex maix ka piang pui Isarela khankix kauxcong leeingju awm hoik yuh Aux lox mukheu mai keeing maix Davit pa ah in, ru maix tak ang jud khaing ka piang danggeung pui Isarela khankix heue. ⁶ Phan ang mawh nan, phan kawn simex maix khankix deeh veeh ti khaing daux pa hawt tix khaix Aux mai ang lai priexrien ka lox tawm pingnyap cie Aux mai ka lox tat jhawm prawng pa deuh khankix Aux plak sivoie maix mai hu yuh kaing jhaw siyiex tang kaux mai krub ka kix, ⁷ khaix an Aux tak tik pui Isarela khankix khaing haktiex

pa tawx Aux ka kix mai nyiex buan pa yuh Aux mawh pa singax singeh ka son ceukaux Aux, Aux tak tik an khaing plak sivoie ngai Aux, pui Isarela khawmuik tak lih awm lox tiag mai lox sibriem ka plak sivoie pui heue. ⁸ Nyiex pa lhaong in, pui pa lailing hawt baoh in kukaux, tak koe pa daox deng mai koe lox sibriem ah nin, Simiang Siyiex yuh nin ka haktiex in mai ka nyiex buan in kheu jao patix lie? ⁹ Khaix an, kix tak deeh pawk ah nin, mawh kheu hoik tikvud kix ka Simiang Siyiex Siyiex kix, Siyiex tix pa hoik viex taxdu kix lih khaing meung Ejiptux mai eenrhawm tix ka siyiex tang kaux mai krub mai yuh kaing son kix, mawh kheu nan, Simiang Siyiex viex krax pa lauxleeing hoek ka piang kix heue."

Yuh Sijax Mukheu Mai Hiram *(2Been 8:1-18)*

¹⁰ Yam hoek ka daux tixnga num, khaix hoik sum Sawlamon nyiex ra lhang pa mawh nyiex buan Simiang Siyiex mai nyiex haw ot tix, ¹¹ Hiram simiang veng Turux teem Sawlamon ka khaox Arit mai khaox gix mai khri tomnie awm pa koe rhawm nawh ti sang cie, simiang Sawlamon kawx deeh tawx Hiram cie veng khankix tixnga veng pa koe ka daux haktiex Galilie heue. ¹² Simiang Hiram lih khaing veng Turux mai hu jhak ka veng pa hoik tawx Sawlamon ka nawh, viang mawh nan, nawh ang khawrhawm ka heue. ¹³ Mawh kheu nan, nawh ah nin, "Pux aux eue, veng pa hoik tawx maix ka aux khankix, mawh veng pa yuh ka mawh? " Mai nawh kok haktiex baoh an mawh Khabulax tom in singaix heue. ¹⁴ Hiram ploi pui hu tawx khri tixyieh tixnga talantan ka simiang. ¹⁵ Grawng pa koh simiang Sawlamon mau ka pui khankix mawh sonsang sum nyiex buan Simiang Siyiex mai nyiex haw ot nawh mai veng Milaw mai guh veng Yerusalim, veng Hazaw, veng Megidaw mai veng Geza khankix heue. ¹⁶ Pharaw simiang Ejiptux hu puing ka veng Geza, gleeing veng an ka ngu mai pah pui Khanan pa ot ka daux veng mai nawh tawx veng an awm totaix ka kawn sibun tix, moeng simiang Sawlamon, ¹⁷ Sawlamon deeh sum veng Geza mai veng Biethawron plak jee, ¹⁸ veng Baliet mai veng Tama pa

9:2 1Sim 3:5, 2Been 1:7. 9:5 1Sim 2:4. 9:8 2Sim 25:9, 2Been 36:19.

koe ka daux tiag haktiex Yudax, ¹⁹ veng deuh Sawlamon krao kraung khrai mai veng deuh linglawx naing brung mai veng deuh krunaing brung mai can pa koe rhawm Sawlamon ti sum ka daux veng Yerualiem mai Lebanon mai ka daux meung haktiex dee pa kuang nawh khawmuik heue. ²⁰ Pui pa kawm deuk khaing pui Amawrix, pui Hetax, pui Perazix, pui Hewix mai pui Yebusix pa ang mawh pui Isarelix khankix ²¹ mai cub kix mawh pa deuk ka daux haktiex pa ang Isarelix nyang pon yuh kix lauxlak pakleeing khawmuik, Sawlamon kieh kix yuh siliex tom hoek daux in singaix heue. ²² Viang mawh nan, Sawlamon ang lai kieh pui Isarelix yuh siliex, nawh kieh kix mawh pui naing mai kawncau nawh mai cao kaing krunaing, cao kaing naing mai cao kaing cub linglawx naing brung mai cao kaing cub pui naing brung khankix heue. ²³ Cao kaing pa kuang ka piang kaing jhaw koe phuan yieh tixphan kaux, kix mawh cao kuang ka piang pui yuh kaing jhaw khankix heue. ²⁴ Kawm sibun Pharaw lih khaing veng Davit mai hu ot ka nyiex tix pa hoik sum Sawlamon ka son nawh, khaix an, Sawlamon deeh cox sum ka veng Milaw heue. ²⁵ Sawlamon yuh krax tan pa gleeing mai krax tan pa nhim tix num loe bawg ka piang khu dee tan pa sum nawh ka son Simiang Siyiex mai gleeing nyawng bhawng ka plak sivoie Simiang Siyiex mai nawh hoik sum nyiex buan heue. ²⁶ Sawlamon yuh reu ting ka daux veng Eziongebax pa koe praok rawm sigrit sigra raoh ka daux haktiex Edom heue. ²⁷ Hiram ploi kawncau tix pa tawng krax rawm sigrit sigra, hu yuh kaing tau mai pui Sawlamon khankix heue. ²⁸ Kix hu ka veng Awphirax mai pon viex khri pon yieh tixnga talantan khaing tan mai kix viex tawx ka Simiang Sawlamon heue.

Nangsimiang Shebax Hoek Fi Ka Sawlamon

(2Been 9:1-12)

10 Yam mhong nangsimiang Shebax ka ao min ceukaux Sawlamon kheu ceukaux Simiang Siyiex, nawh hoek ti cheukcheu Sawlamon ka lox pa kied nu ti pawk heue. **9:25** Lih 23:17, 34:23, Pi 16:16. **10:1-10** Mat 12:42, Luk 11:31.

² Nawh hoek ka veng Yerualiem tau mai pui pahawt nawh tomnie mai Kala-uk pa tang pa sioebhawng kuceu mai khri tomnie mai siang simaox pa ngawh mai yam bleeh nawh Sawlamon krai can pa koe daux rhawm tix khawmuik heue. ³ Sawlamon deeh pawk pa chawk nawh khankix, ceu pa ang Sawlamon pon pawk ang koe tix ceu kawx heue. ⁴ Yam yaox nangsimiang Shebax ka pingnya cuyi pa koe Sawlamon mai ka nyiex haw pa hoik sum nawh ⁵ mai pa ih pa koe ka piang pheeng sawm nawh khankix mai dee ngawm cao giex kaing mai kawncau pa khankheu nawh mai kraung ceep kix mai pa giex kawx nyaux nawh mai krax pa khre nawh krax tan pa gleeing tix, ka daux nyiex Simiang Siyiex, nawh hoik daoxdeng kah tom ang tix lai koe lox krai heue. ⁶ Nawh ah nin ka simiang, "Canceu pa hoik mhong aux yam ot aux ka haktiex tix, grawng kaing pa yuh maix mai pingnya cuyi pa koe maix rug mawh tete heue." ⁷ Viang mawh nan, aux ang nyang yumrhawm ka lox ankix sivoie ang aux nyang yaox ka ngai tix mai ceu ankix ang nyang mawh tix plak awm pasax mhong aux, pingnya cuyi maix mai kraung khrai sinngao maix, hoik nielheu khaing pa mhong aux heue. ⁸ Kieh pui maix mai kawncau pa cung plak sivoie maix jheengjheeng mai pa mhong gumlox pingnya cuyi maix khankix koe buanson! ⁹ Kieh Simiang Siyiex pa khawrhawm ka maix mai pa yaog maix ka piang dangngeung pui Isarelix koe buanson! Mawh kheu Simiang Siyiex moh ka pui Isarelix leeingju, Nawh Cao yaog maix mawh simiangsonang prawngca maix daux pa rahsee heue." ¹⁰ Nawh tawx khri tix yieh tixnga talantan mai sidah bhawng tomnie mai siang simaox pa kied ngawh, ceu sidah bhawng pa kied nie awm in, pa tawx nangsimiang Shebax ka simiang Sawlamon, ang lai hoek khaix an tix bawg kawx heue. ¹¹ Lheu khaing an, reu ting Hiram, viex khri mai khaox Alagun khankix mai siang simaox pa kied ngawh hoek khaing Awphirax tomnie heue. ¹² Simiang yuh rong ka khaox Alagun son nyiex buan Simiang Siyiex mai son nyiex haw mai yuh ting sideet mai ting pawd son pui rhax lai heue. Ceu khaox Alagun khankix ang lai sax hoek

mai ang lai sax yaox tom hoek in singaix heue. ¹³Simiang Sawlamon tawx ceu pa koe rhawm nangsimiang ti sang cie khawmuik, lheu khaing an simiang Sawlamon baox tawx ceu pa mhaing nangsimiang ti cie khankix, khaix an nawh deeh ing mai kawncaw tix ka haktiex tix heue.

Krax Magmi Sawlamon (2Been 9:13-24)

¹⁴Krax ciien khri pa pon simiang Sawlamon ka dauh tix num koe liah yieh tixgliah liah talantan heue. ¹⁵Lheu khaing an, nawh baox pon khaing pui pa yuh lai geu khankix mai khaing keen pa tawx pui lai geu khankix mai khaing simiang Arebia khankix mai khaing cao kuang haktiex khankix heue. ¹⁶Simiang Sawlamon yuh pliah tieb pa ting ka khri ra yieh plah pa ciien tix plah liah yieh shekhe heue. ¹⁷Nawh baox yuh plah tieb pa iak ka khri loe yieh plah pa ciien tix plah loe yieh mina mai simiang deuh an khankix ka dauh nyiex haw pa hoik sum ka khaox khaing nong Lebanon heue. ¹⁸Lheu khaing an simiang yuh dangngeung ting ka nga sang mai om an ka khri nawnaw heue. ¹⁹Dangngeung an koe bawng liah glawk mai dee neung plak khaix lawmle, dangngeung khawm ra plak koe dee deuh taix tix, ka praok dee deuh nawh taix tix koe rieang sivai sangsi pa cung ra mu ka heue. ²⁰Rieang sivai sangsi kao ra mu cung ka piang glawk bawng ku glawk plak in mai plak an heue. Pa yuh awm in ang koe ka meung tang dah tix meung kawx heue. ²¹Kawx nyaux simiang Sawlamon yuh ka khri mai can kawx nyaux yuh nawh ti deuh ka dauh nyiex haw pa sum nawh ka khaox khaing nong Lebanon, yuh tix ka khri nawnaw mai ang lai yuh ka mau, mawh kheu bauxju Sawlamon ang sawn mau mawh pa koe jum heue. ²²Mawh kheu simiang koe cub reu ting pa yuh lai geu ka veng Tasux dauh rawm sigrit sigra tau mai cub reu ting Hiram ka veng Tasux heue. Cub reu ting an hoek bleeh mai viex khri, mau, nga sang, rao khaox khankix mai sim kaung khankix hoek ka nawh loe num tix bawng heue. ²³Simiang Sawlamon kied magmi mai koe

10:26 1Sim 4:26. 10:27 Pi 17:17. 10:28 Pi 17:16. 11:2 Lih 34:16, Pi 7:3-4.

pingnya cuyi khaing simiang ka piang haktiex khawmuik heue. ²⁴Pui piang haktiex khawmuik hoek ti sawg ka Sawlamon sonsang nghieng ka pingnya cuyi nawh pa hoik tawx Siyiex ka dauh rhawmrhi nawh heue. ²⁵Pui kukaux viex totaix tix, pa mawh kraung khri kraung mau, kraung ceep, kraung naing, sidah bhawng kuceu, brung mai la khankix mai keen pa caw ti tawx tix num hoik tix numhoekkanawh heue.

Liag Lah Lai Pa Yuh Sawlamon

(2Been 1:14-17; 9:25-28)

²⁶Sawlamon khrawm linglawx naing brung mai pui naing brung khankix, nawh koe linglawx naing brung tix rheng pon yieh lhang mai pui naing brung tix mheen ra rheng kaux, nawh priex ka dauh veng pa deuh linglawx naing brung tau mai tix ka dauh veng Yerusaliem heue. ²⁷Simiang kieh mau pa koe dauh veng Yerusaliem khankix awm lon simaox mai kieh khaox Arit awm khaox ruh pa kuah ka dauh ngawd dauh lung heue. ²⁸Brung pa koe simiang Sawlamon mawh pa laig khaing veng Kaw meung Ejiptux, pui yuh lai geu simiang hoik liag awm jum pa hoik tat kix ti deuh khaing veng Kaw heue. ²⁹Jum linglawx naing brung tix lhang pa liag kix khaing meung Ejiptux, mawh liah yieh shekhe, brung tix mu tix yieh tixphuan shekhe, kix kawx coh linglawx naing brung mai brung khankix ka simiang Hittix mai simiang Surix heue.

11 **Sawlamon Veehrhawm Khaing Siyiex**
Simiang Sawlamon moh ka sibun tang praix tomnie, lheu khaing kawn sibun Pharaw, nawh baox moh sibun Mawbax, sibun Amawnix, sibun Edom, sibun Sidom, sibun Hetax khankix, ²Simiang Siyiex kraik grawng pa dex mai pui tang praix ka pui Isarelah ah nin, "Pex tak ang pon teei ti mex moeng ka kix mai kix kawx tak ang pon ti teei ka pex, mawh kheu kix tak kieh sok rhawm pex veeh tix singai mai hawt khaix siyiex kix, simiang Sawlamon kied koe rhawmghoing ka sibun tang praix heue. ³Nawh koe moeng aliah yieh kaux mai moeng iak loe yieh kaux mai moeng nawh khankix hoik kieh sokrhawm nawh veeh hu heue. ⁴Yam hoik kuad Sawlamon moeng nawh

khankix kieh rhawm nawh veeh ti hawt khaix siyiex tang kaux khankix mai rhawm nawh ang lai kaux sijax ka Simiang Siyiex, awm rhawm pa koe keeing nawh Davit heue. ⁵ Mawh kheu jao in, Sawlamon hawt hu khaix Ashatariet siyiex bun phi pui Sidom mai Milakcom siyiex pa seeing brai pui Amon khankix heue. ⁶ Sawlamon yuh pa caox plak sivoie ngai Simiang Siyiex mai ang lai hawt grawng lawng khaix Simiang Siyiex grumnaog awm pa yuh keeing nawh Davit heue. ⁷ Sawlamon sum dee pa lhaong son Khemawsha siyiex pa seeingbrai pa krub pui Mawbax ka piang gawng pa koe ka plak toh veng Yerusaliem mai ka son Mawliet siyiex pa seeing brai pa krub pui Amon khankix heue. ⁸ Mai nawh yuh khu tan ka son moeng tix pa mawh pui tang praix khankix sonsang gleeing nyawng bhawng mai tan ka siyiex kix heue. ⁹ Simiang Siyiex songrhawm ka Sawlamon, kheu jao hoik veeh rhawm nawh ti singai khaing Simiang Siyiex pui Isarelaux pa hoik lih bleeh ka nawh ra bawg ¹⁰ mai hoik tawm grawng pa dex son in ka nawh sonsang ang nawh lai hawt khaix siyiex tang kaux khankix, viang mawh nan, nawh ang lai cu nghieng ka lox pa hoik tawm Simiang Siyiex heue. ¹¹ Simiang Siyiex ah nin ka Sawlamon, "Kheu jao yuh maix ceu in mai kheu jao ang maix priexrien ka lox sijax mukheu Aux mai lox tat jhawm prawng pa hoik tawm Aux ka maix khankix, Aux tak teei meung haktiex khaing maix mai tawx ka kawncau maix heue. ¹² Viang mawh nan, Aux kawm kia pakngai keeing maix Davit mai ang nyang yuh ceu an yam kawm im ju maix, viang mawh nan, Aux tak deeh teei meung haktiex ka dauw tawm taix kawm simex maix heue. ¹³ Viang yuh ka mawx kawx, Aux tak ang teei meung haktiex khawmuik mai Aux tak tawx ceu pui tix cub ka kawm simex maix, kheu jao jhak Aux pakngai kawncau Aux keeing maix Davit mai veng Yerusaliem pa hoik laug Aux ti deuh heue." ¹⁴ Simiang Siyiex sorhawm Hadat pui Edom pa mawh doehru simiang Edom tiehfeen ka Sawlamon heue. ¹⁵ Mawh kheu yam ot Davit ka dauw Edom dauw bawgyam pa hoik luan, Yuabax cao kaing

naing ting lih hu sonsang sipaung ka simex pui Edom pa hoik pah kix kah heue. ¹⁶ Mawh kheu Yuabax mai pui Isarelaux, kawm ot tan liah khix, tom hoik sidah pah nawh simex Edom kukaux heue. ¹⁷ Yam an, Hadat lih to ka meung Ejiptux tau mai pui Edom khankix pa mawh kawncau keeing nawh, yam an Hadat kawm iak heue. ¹⁸ Kix lih khaing haktiex Midian mai hoek ka haktiex Param mai viex pui Param hu mai tix tom hoek bleeh ka Pharaw meung Ejiptux mai simiang tawx nyiex tix lhang mai pa ih mai haktiex ka son nawh heue. ¹⁹ Hadat yuh pa khaw ka sivoie Pharaw, mawh kheu nan, nawh tom tawx Hadat moeng pux moeng tix, sibun an mawh pux nangsimiang Tapheniet heue. ²⁰ Pux Tapheniet keh kawm simex pa kaux Genubat, Tapheniet hoik eei nawh ting ka dauw nyiex haw Pharaw mai Genubat ot tau mai kawm nyiexma Pharaw mai sinax kawm simex Pharaw heue. ²¹ Yam mhong Hadat ka yum Davit tau mai taxdu nawh mai yam hoik yum Yuabax cao kaing naing ting pui Isarelaux, yam ot kix ka dauw meung Ejiptux, Hadat ah nin ka Pharaw, "Kieh aux lih sonsang ing aux ka haktiex tix heue." ²² Pharaw deeh ah nin ka nawh, glang ot maix tin ang maix fahrhawm ka ceu tix maix lai sawg krax pa sang deeh ing tix ka haktiex tix?" Nawh deeh pawk lox ah nin, "Ang koe tittix, ca kieh aux ing ngie heue." ²³ Siyiex deeh sorhawm tang kaux pa mawh Rezon kawm simex Eliyadax pa to khaing cao simiang tix Hadadeza simiang haktiex Zawbax tiehfeen ka nawh heue. ²⁴ Nawh khrawm pui khankix hoek ka tix mai mawh cao kaing ka piang cub pui pa tiehfeen, yam pah Davit pui ka haktiex Zawbax mai kix hu ka veng Damase mai ot tan, nawh mawh simiang ka veng Damase heue. ²⁵ Rezon tiehfeen ka pui Isarelaux, singaix yam kawm im ju Sawlamon, nawh yuh pa caox awm pa hoik yuh Hadat mai nawh kuang ka haktiex Surix mai seeing ka pui Isarelaux heue.

Pa Deeh Tiehfeen Yerobom

²⁶ Kawncau Sawlamon Yerobom kawm simex Nebat pui Epharim yaong Zeredax yaog tix tiehfeen ka simiang, ceukaux miex nawh

mawh Zerua pa mawh miexmai heue. ²⁷ In mawh grawng pa tiehfeen nawh ka simiang, kheu sum Sawlamon veng Milaw mai deeh cox guh veng pa lauxleeing keeing nawh Davit heue. ²⁸ Yerobom mawh pui pa ting riang mai pui vao tix kaux mai Sawlamon yaox mawh pui pa awn ju pa kied coca tix mai yaog nawh mawh cao kuang ka piang cao yuh kaing nyiex Yosiep heue. ²⁹ Ka dauh tix ngaix yam lih hu Yerobom khaing Yerusaliem, cao jhai Ahiyax pui veng Shilaw ceep kraung khraox mai hoek rieb nawh ka dauh krax mai kiex ot ka dauh kaungnongnong heue. ³⁰ Ahiyax peeik kraung khraox ceep tix mai riah lih kao ra siag heue. ³¹ Nawh ah nin ka Yerobom, "Teei ti cie in kao siag, mawh kheu Simiang Siyiex pui Isarelaux hoik ah nin, jhak heue, Aux rud ti teei meung haktiex khaing dauh tawm taix Sawlamon mai tak tawx ceu pui kao ceu ka maix, ³² viang mawh nan, nawh tak pon ti cie tix ceu ngie, mawh kheu jhak Aux ngai kawncau tix Davit mai veng Yerusaliem pa mawh veng pa hoik laug Aux lih khaing dauh ceu pui Isarelaux, ³³ mawh kheu nawh hoik tikvud ka Aux mai krub ka siyiex bunphi Ashatariet, siyiex pui Sidom mai ka Milakhom siyiex pui Amon khankix mai ang lai lawng dauh krax Aux sonsang yuh tix ceu pa mawhmeh ka sivoie ngai Aux mai nawh ang lai hawt lox been prawngsee mai lox tat jhawm prawng pa deuh Aux awm keeing tix Davit heue. ³⁴ Viang yuh nan kawx Aux tak ang lai teei meung haktiex khaing dauh taix nawh khawmuik, mawh kheu Aux hoik yaog nawh mawh cao kuang baux singaix im ju nawh, kheu jao kawncau Aux Davit pa hoik laug Aux pa hoik hawt lox tawm pingnyap mai lox tat jhawm prawng pa deuh Aux heue. ³⁵ Aux tak teei meung haktiex khaing tawm taix kawn simex Sawlamon mai deeh tawx ceu pui ka maix kao ceu heue. ³⁶ Son kawn simex nawh, Aux tak tawx ceu pui tix ceu sonsang rrieng kawng kawncau Aux Davit jheengjheeng, plak sivoie Aux ka veng Yerusaliem pa mawh veng pa hoik laug Aux sonsang deuh ceukaux Tix tan heue. ³⁷ Aux tak teei maix mawh cao kuang awm pa koe rhawm maix khawmuik mai maix tak mawh

simiang ka piang pui Isarelaux heue. ³⁸ Phan maix nghiet lox tawm Aux mai lawng dauh krax Aux mai yuh pa rahsee ka plak sivoie Aux mai priex ka lox tawm pingnyap pa deuh Aux mai lox tat jhawm prawng Aux khankix, awm pa hoik yuh kawncau Aux Davit, Aux tak ot tau mai maix mai Aux tak sum ti tawx nyiex pa kauxcong ka son maix, awm pa hoik sum Aux son Davit mai Aux tak tawx ceu pui Isarelaux ka maix heue. ³⁹ Kheu jao in, Aux tak tawx krax kharhawm ka doehru Davit, viang mawh nan, ang mawh leeingju heue." ⁴⁰ Sawlamon sawg ti pah ka Yerobom, viang mawh nan, Yerobom to ka simiang Shishak meung Ejiptux mai ot tan tomyum Sawlamon heue.

Pa Yum Sawlamon (2Been 9:29-31)

⁴¹ Grawng kaing pa deuk mai can pa hoik yuh Sawlamon mai grawng pa koe pingnya cuyi nawh khankix hoik tiem ti deuh ka dauh phuk lai simiang Sawlamon ang mawh lie? ⁴² Nawh ot ka veng Yerusaliem mai kuang ka piang pui Isarelaux tixpon num heue. ⁴³ Sawlamon hoik lauxlee tix tau mai taxdu tix khankix mai kix sipaung nawh ka dauh veng keeing nawh Davit mai Rehobom kawn simex nawh deeh plud ti kuang khaix nawh heue.

Pa Deeh Tiehfeen Ka Rehobom

(2Been 10:1; 11:4)

12 Rehobom hu ka veng Shekhim, mawh kheu pui Isarelaux hoik lih hu ka Shekhim khawmuik, sonsang deeh yaog nawh mawh simiang heue. ² Yam mhong Yerobom kawn simex Nebat ka grawng an, nawh kawn ot ka dauh meung Ejiptux, kheu jao hoik to nawh khaing sivoie simiang Sawlamon mai Yerobom deeh hoek khaing meung Ejiptux heue. ³ Kix ploi pui hu kok nawh deeh ing khaix an, Yerobom mai cub pui hun Isarelaux hoek ah nin ka Rehobom, ⁴ "Keeing maix hoik kieh khaox glawm yix mawh pa ciien, mawh kheu nan yam in deeh kieh beeh glawm kaing ceu pa yuh keeing maix khankix deeh chaong mai deeh yuh khaox glawm ciien nawh khankix pa hoik sau nawh ka piang yix, deeh mawh pa chaong liak! mai yix tak yuh kaing jhaw maix heue." ⁵ Nawh ah nin ka kix, "Lih hu ha, khaix an, loe singaix deeh hoekkaux heue."

Pui khankix lih hu khaing nawh heue. ⁶ Khaix an, simiang Rehobom kum tau mai kuad riex ju pa tawx krax keud ka keeing nawh Sawlamon glang yam im ju nawh ah nin, “Mawh sang tawx pex krax keud krax sawn ceu pa yuh ka mawh sonsang deeh pon pawk aux lox pui ankix?” ⁷ Kix deeh ah nin ka nawh, “Phan maix mawh kawncau pui inkix ka daux in singaix mai hawt ti yuh kaing jhaw kix, kix tak mawh kawncau maix leeing ju heue.” ⁸ Nawh thiang ka lox kuad riex ju pa tawx krax keud krax sawn ka nawh mai nawh hu kum ka cub pui pa awn ju pa ting tau mai nawh pa tawx krax keud ka nawh khankix heue. ⁹ Nawh ah nin ka kix, “Mawh sang tawx pex krax keud ka aux yuh ka mawx? Sonsang deeh pawk lox pui inkix pa ah nin ka aux, kieh khaox glawm pa hoik sau keeing maix ka piang yix deeh chaong liak” ¹⁰ Cub pui pa awn ju pa ting tau mai nawh khankix ah nin ka nawh, “Maix tak krai ka pui pa hoik ah nin ka maix, keeing maix hoik kieh khaox glawm yix mawh pa ciien viang mawh nan, maix deeh kieh chaong ka piang yix liak maix tak deeh pawk ah nin ka kix, giien tiah iak aux nielheu pu khaing nyoi keeing aux heue. ¹¹ Yam in, keeing aux hoik sau khaox glawm ciien ka piang pex, aux tak sang baox naok khaox glawm piang pex, keeing aux hoik sivied pex ka khaox saux viang mawh nan, aux tak sivied pex ka tamtim heue” ¹² Mawh kheu nan, Yerobom mai cub pui hun khankix deeh hoek ka Rehobom awm pa hoik tin simiang, “Khaix an daux loe singaix deeh hoek ka aux heue.” ¹³ Simiang deeh pawk lox kiien ka pui khankix mai thiang ka krax keud krax sawn pa hoik tawx kwad riex ju ka nawh heue. ¹⁴ Nawh deeh krai ka kix awm krax keud krax sawn pa hoik tawx cub pui pa awn ju ka nawh ah nin, “Keeing aux hoik sau khaox glawm ciien ka piang pex, aux tak sang baox naok khaox glawm ciien ka piang pex, keeing aux hoik sivied pex ka khaox saux, viang mawh nan, aux tak sivied pex ka tamtim heue.” ¹⁵ Simiang ang lai nghieng ka lox pui an

10:26 1Sim12:16 2Sa 20:1.

khankix, mawh kheu hoik mawh pa kaoh khaing Simiang Siyiex sonsang kieh Nawh Cao gumlox tix grum naog, awm pa hoik krai Simiang Siyiex ka Ahiyax, pui veng Shilaw ka son Yerobom kawn simex Nebat heue. ¹⁶ Yam yaox pui Isarelax khawmuik ka ang simiang lai nghieng ka lox kix, pui khankix deeh pawk lox ah nin, “Been pa hoik pon ex khaing Davit mawh ceu patix? Ex ang koe sinngao ka daux simie Yesie heue. Pui Isarelax khankix eue, deeh ing ka nyiex gox pex! Davit eue, kiangieng ka nyiex cao maix! “Mawh kheu nan, pui Isarelax khankix deeh ing ka nyiex gox tix heue.” ¹⁷ Yehobom kuang ka piang pui Isarelax khankix pa ot ka daux meung Yudax heue. ¹⁸ Khaix an, simiang Rehobom ploj Adawram pa mawh cao kaing pa koh keen hu ka pui Isarelax khankix mai kix dheem nawh ka simaox heue. Mawh kheu nan, simiang Rehobom niied ti haok ka piang linglawx naing brung cao tix mai to ing ka veng Yerusalim heue. ¹⁹ Pui Isarelax khankix hoik tiehfeen ka nyiexma simiang Davit tom in singaix heue. ²⁰ Yam mhong pui Isarelax ka deeh hoek Yerobom, kix ploj pui hu kok nawh hoek ka daux bang kum pui hun mai kix yaog nawh mawh simiang ka piang pui Isarelax khankix heue. Pui pa hawt khaix doeh nyiexma Davit mawh ngie pui Yudax khaing heue. ²¹ Yam hoek Yehobom ka veng Yerusalim, nawh khawm nyiexma pui Yudax khawmuik tau mai pui Biyamin mai nawh laug ti deuh pui naing tix sien daix mheen kaux sonsang puing ka cub doeh nyiexma pui Isarelax mai sonsang deeh teei kix meung haktiex khaing Rehobom kawn simex Sawlamon heue. ²² Gumlox Siyiex bleeh ka Shemayax pa mawh pui Siyiex ah nin, ²³ krai ka Yehobom kawn simex Sawlamon mai simiang pui Yudax doeh nyiexma Yudax mai Benyamin khawmuik mai ka pui pa kawn deuk khankix ah nin, ²⁴ Simiang Siyiex ah nin, “Maix tak ang pon ti hu puing ka puxaik maix pui Isarelax, kieh puikukaux deehing kanyiextix mawh kheu ceu inkix mawh pa kaoh khaing Aux heue.” Mawh kheu nan, kix nghieng ka

gumlox Simiang Siyiex mai deeh ing awm gumlox Simiang Siyiex heue.

Rieang Kawn Mawie Khri Pa Krub Yerobom

²⁵ Yerobom sum veng Shekhim ka piang gawng Epharim mai ot tan mai lih khaing tan mai baox sum veng Penuelax heue. ²⁶ Yerobom ah nin ka daux rhawm tix, “Yam in meung haktiex in tak mawh pa deeh hoek ka doeh nyiexma Davit heue. ²⁷ Phan pui haktiex khankix hu yuh krax tan appong ka daux nyiex buan Simiang Siyiex daux veng Yerusalim, rhawm pui tak veeh ti hu ka cao simiang Rehobom pa mawh simiang pui Yudax mai kix tak pah aux yum mai deeh ing ka Rehobom pa mawh simiang pui Yudax heue.” ²⁸ Mawh kheu nan, simiang kum tau mai pui tang kaux mai yuh rieang kawn mawie khri ra mu ah nin ka pui khankix, “Grawng pa haok hu ka veng Yerusalim mawh pa nu heue. Pui Isarelax khankix eue, jhak ka Siyiex pa viex pex lih khaing meung Ejiptux heue.” ²⁹ Nawh deuh ka daux veng Betelax tix mu mai ka daux veng Dan tix mu heue. ³⁰ In hoik lih mawh phimap tix ceu, mawh kheu pui khankix hu krub rieang kawn mawie khri an ka Betelax tom hoek ka veng Dan heue. ³¹ Nawh hoik sum nyiex krub ka dee lhaong mai yaog cao giex kaing li khaing cub pui pa ang mawh cub kawn simex pui Lewix khankix heue. ³² Yerobom yuh pawie ting ka daux khix daix singaix phuan awm pawie pa hoik yuh kix ka daux meung Yudax mai nawh tan krax tan pa appong ka piang khu dee tan mawh kheu nan, nawh yuh krax tan pa appong ka rieang kawn mawie khri, pa hoik yuh tix ka daux veng Betelax mai deuh cao giex kaing li khankix ot ka dee lhaong pa hoik yuh tix ka daux veng Betelax heue. ³³ Nawh tan krax tan ka piang khu dee tan yuh tix ka daux khix daix kao phuan ngaix, pa mawh khix singaix hoik tat nawh ka daux rhawm tix mai nawh yuh pawie tix mu son pui Isarelax mai gleeing nyawng bhawng khankix ka piang khu dee tan an heue.

13 Lox Pa Viex Pui Siyiex

Jhak heue, pui Siyiex tix kaux lih hu khaing meung Yudax mai hoek ka daux veng **12:28** Lih 32:4. **12:32-33** Krub 23:33-34. **13:2** 2Sim 23:15-16.

Betelax awm gumlox pa tawm Simiang Siyiex yam cung Yerobom hawt khu dee tan sonsang gleeing nyawng bhawng heue. ² Nawh deuh phimap ka khu dee tan an kok yo gumlox pa tawm Simiang Siyiex ah nin, “Khu dee tan, khu dee tan eue, Simiang Siyiex ah nin, jhak heue, kawn simex pa kaux Yosiyax tak keh khaing doeh nyiexma Davit, kaw an tak pah cao giex kaing li pa appong krax tan ka dee pa lhaong khankix pa gleeing nyawng ka piang maix mai si-ang pui khankix tak gleeing tix ka piang maix heue.” ³ Nawh hoik tawx mhai tix ceu ka daux singaix an ah nin, “In mawh mhai pa hoik krai Simiang Siyiex, khu dee tan in tak max mai nyaox pa koe piang nawh khankix tak roik heue” ⁴ Yam mhong Yerobom ka lox pa ah pui Siyiex, pa deuh phimap ka khu dee tan daux veng Betelax, nawh nyeu taix tix lih piang khu dee tan ah nin, “Giex nawh”!, taix pa nyeu nawh hoik kroh hu mai ang lai deeh pon bluh hoek ka tokaux tix heue. ⁵ Khu dee tan an hoik max mai nyaox khankix roik khaing piang khu dee tan, awm mhai pa krai pui Siyiex an, kheu gumlox Simiang Siyiex heue. ⁶ Simiang ah nin ka pui Siyiex an, “Yuh buanson deeh khioxkhaw ka Simiang Siyiex maix mai rawgbuan ka son aux, sonsang deeh moi taix aux!” mai pui Siyiex deeh khioxkhaw ka Simiang Siyiex mai taix simiang deeh moi mai deeh awm phao voe heue. ⁷ Simiang ah nin ka pui Siyiex, “Hoek ka nyiex tau mai aux, kieh tokaux maix koe riang rao mai aux tak tawx totaix ka maix heue.” ⁸ Pui Siyiex deeh ah nin ka simiang, “Viang maix sang tawx nyiex haw ka aux tix plakkawx, aux ang pon hu tau mai maix, Aux ang pon ih blah mai ang pon nyaux rawm baoh in, ⁹ mawh kheu Simiang Siyiex hoik tawm lox ka aux ah nin, maix tak ang pon ti ih blah, ang pon ti nyaux rawm mai ang pon ti deeh ing ka krax pa hoek maix heue” ¹⁰ Mawh kheu nan, nawh deehhu ka krax tang nyaing mai nawh ang lai ing ka krax kaoh tix khaing veng Betelax heue.

Grawng Yum Pui Siyiex

¹¹ Yam an, cao jhai pa riex ju tix kaux pa ot daux veng Betelax, kawn simex nawh hoek

mai kraiee tix mhong kaing pa yuh pui Siyiex khawmuik ka dauveng Betelax mai lox pa hoik kraiee nawh ka simiang heue. ¹² Keeing kix deeh ah nin, "Mawh ing nawh krax mawx?" mai kawm simex nawh jhi krax ing pui Siyiex pa kaoh khaing meung Yudax heue. ¹³ Nawh ah nin ka kawm simex tix, "Sau an brug son aux ka piang la," mai kix sau an brug son nawh mai nawh brug la, ¹⁴ mai hawt khaix pui Siyiex mai yaox ka ngawm nawh greem khaox tiah ah nin ka nawh, "Mawh maix pui Siyiex pa kaoh khaing meung Yudax lie?" mai nawh ah nin, "Aux mawh pui an heue." ¹⁵ Nawh ah nin ka nawh, "Hoek dauveng nyiex mai ih priex tau mai aux heue." ¹⁶ Nawh ah nin, "Aux ang pon ing, ang pon ih priex mai ang pon nyaux rawm tau mai maix baoh in heue. ¹⁷ Mawh kheu gumlox khaing Simiang Siyiex kraiee ah nin ka aux, "Maix tak ang pon ti ih blah mai ang pon ti nyaux rawm baoh tan mai ang lai pon ti ing ka krax kaoh maix heue." ¹⁸ Nawh ah nin ka nawh, "Aux kawm mawh cao jhai tix kaux awm maix mai kawncau Siyiex hoek ti kraiee gumlox pa tawm Simiang Siyiex ka aux ah nin, "Viex nawh hoek tau mai maix ka dauveng nyiex sonsang ih priex mai nyaux rawm heue." Viang mawh nan, nawh hoik pielhen ka nawh heue. ¹⁹ Nawh deeh ing tau mai nawh mai ih priex mai nyaux rawm ka dauveng nyiex nawh heue. ²⁰ Yam ngawm hawt pheem, gumlox Simiang Siyiex bleeh ka cao jhai pa viex nawh hoek tan, ²¹ mai nawh kok ah nin ka pui Siyiex pa kaoh khaing meung Yudax, Simiang Siyiex ah nin, "Mawh kheu jao ang maix nghiet lox Simiang Siyiex mai ang priex ka lox pingnyap pa tawm Simiang Siyiex ka maix ²² mai deeh hoek ti ih priex mai nyaux rawm ka dah dee pa hoik tawm Simiang Siyiex ka maix yuh nin, paw ih priex mai paw nyaux rawm, tokaux yum maix tak ang pon ti hoek ka simeeig keeing maix khankix heue." ²³ Khaix hoik ih nawh priex mai nyaux rawm, cao jhai viex nawh hoek dee an, sau an brug ka piang la son nawh heue. ²⁴ Yam lih hu nawh khaing tan, sivai sangsi sipub nawh ka dauveng krax mai kiied nawh mai tokaux yum nawh cod ka dauveng

krax, la brug nawh mai sivai sangsi cung hawt praok nawh heue. ²⁵ Pui hu hawt baoh tan yaox ka tokaux yum pa cod dauveng krax mai sivai sangsi pa cung praok nawh, kix kraiee grawng an ka dauveng ot cao jhai riex ju heue. ²⁶ Yam mhong cao jhai pa deeh viex nawh hoek khaing dauveng krax ka grawng an, nawh ah nin, "An mawh pui Siyiex pa ang nghiet ka gumlox Simiang Siyiex mawh kheunan, Simiang Siyiex hoik ap nawh ka sivai sangsi, kieh kiied nawh yum, awm gumlox pa hoik kraiee Simiang Siyiex ka nawh heue." ²⁷ Nawh ah nin ka kawm simex tix khankix, "Sau an brug ka piang la son aux," mai kix kawm sau an brug ka piang la heue. ²⁸ Nawh lih hu mai yaox tokaux yum an ka dauveng krax, la mai sivai sangsi kawm cung praok tokaux yum an, sivai sangsi ang nyang ih tokaux yum an mai ang nyang kiied ka la an heue. ²⁹ Cao jhai riex ju an yaog ti teei tokaux yum pui Siyiex mai tang nawh ka piang la mai viex nawh ing ka dauveng, nawh yieemdoe mai sipaung ka nawh heue. ³⁰ Nawh deuh tokaux yum ka dauveng simeeig tix mai kix yieemdoe ka son nawh ah nin, "O pux aux eue," ³¹ Khaix hoik sipaung kix ka pui Siyiex an, nawh ah nin ka kawm simex tix khankix, "Yam yum aux sax sipaung aux ka dauveng simeeig dee sipaung aux pui Siyiex in mai deuh si-ang aux ka praok si-ang nawh heue." ³² Mawh kheu lox pa riagyo nawh kheu gumlox Simiang Siyiex pa deuh phimap ka khu dee tan ka veng Betelax mai ka nyiex krub khankix pa koe ka dee pa lhaong mai pa koe ka veng Samarix grumnaog tete heue. ³³ Khaix hoik ceu an, Yerobom ang nyang veeh tix khaing krax caoxcaig pa yuh tix, lheu khaing an nawh baoh yaog cao giex kaing khankix khaing dauveng cub pui kuceu son dee pa lhaong khankix, can pui pa koe rhawmrhi ti yuh cao giex kaing li khankix nawh hoik yuh kix singax mai kieh kix mawh cao giex kaing li ka dee pa lhaong heue. ³⁴ Ceu in hoik mawh phimap ka doeh nyiexma Yerobom sonsang tat ti tik mai yuh nawh lauxleeing khaing piang haktiex in heue.

14 *Prawngca Doeh Nyiexma Yerobom*
Yam an, Abijam kawm simex Yerobom saux heue. ² Yerobom ah nin ka moeng tix,

“Kaoh mai loh grang tokaux maix son ang kix tawng mawh maix moeng Yerobom mai hu ka veng Shilaw, cao jhai Ahiyax pa kraï sang mawh aux simiang ka piang pui inkix ot tan heue. ³ Teei ti viex blah kao lon mai blah rhi khlawp tixblah mai rawm hia tix kawng mai hu ka nawh, nawh tak kraï maix mhong pa sang lih ti mawh ka kawm nyawm an heue.” ⁴ Moeng Yerobom yuh awm an, nawhyaog ti hu ka veng Shilaw mai hoek ka nyiex Ahiyax viang mawh nan, Ahiyax ang chix yaox mawh kheu hoik vuvi ngai nawh jao hoik riex ju nawh heue. ⁵ Simiang Siyiex ah nin ka Ahiyax, “Moeng Yerobom sang hoek chawg grawng kawm simex tix ka maix, kheu saux kawm simex nawh, maix caw ti ah nin ka nawh, yam hoek nawh, nawh tak yuh grang tix awm bun tang kaux heue.” ⁶ Yam mhong Ahiyax ka luah caong hu nawh mai yam laig nawh ka diang siviex, nawh ah nin, “Moeng Yerobom eue, laig heue, maix loh grang tix awm pui tang kaux jao patix? Mawh kheu aux hoik ploi kix kraï lox lauxrhawm ka maix heue. ⁷ Hu kraï Yerobom mhong, Simiang Siyiex, Siyiex pui Isarelay ah nin, mawh kheu Aux hoik yaog maix lhaong khaing daux sinax pui khankix mai kieh maix mawh cao kuang ka piang pui Aux Isarelay, ⁸ aux hoik teei meung haktiex khaing doeh nyiexma Davit mai Aux tawx ka maix, viang mawh nan maix ang awm kawncau Aux Davit, pa priex gumlox pingnyap Aux khankix mai hawt grawng lawng khaix Aux khawm rhawm tix mai yuh pa khaw plak sivoë ngai Aux, ⁹ viang mawh nan maix yuh pa nielheu caox khaing pui pa koe sivoë maix, mawh kheu maix hoik hu mai yuh rieang siyiex tang kaux son tokaux tix mai raug ti deuh rieanggrang Asherax khankix sonsang deeh so maix krax songrhawm Aux mai hoik tik vud Aux ka plak khaix tix, ¹⁰ Aux tak kieh krax lauxleeing hoek ka piang doeh nyiexma Yerobom mai tat ti tik kawm simex daux Yerobom kukaux, pa koe ka daux pui

14:10 1Sim 15:29. 14:23 2Sim 17:9-10. 14:24 Pi 23:17. 14:25 2Been 12:2-8.

Isarelay, pa mawh pui pagiexlaung mai pui pa glawd khaing Yerobom mai Aux tak teei ti tik doeh nyiexma Yerobom awm tik pui ka aing heue. ¹¹ Sox tak ih ka pui Yerobom pa yum ka daux veng mai sim raoma tak ih ka pui payum ka daux tiag mawh kheu Siyiex hoik kraï ti deuh heue.” ¹² Kaoh mai ing ka nyiex tix, yam dig caong maix ka daux veng, kawm nyawm an tak yum heue. ¹³ Pui Isarelay tak yiiemdoe mai sipaung nawh, kheu mawh nawh kawm Yerobom tix kaux khaing pa sang hoek ka daux simeeig mawh kheu kawm yaox ceu pa mhawm ka daux nawh ka plak sivoë Simiang Siyiex pui Isarelay ka daux doeh nyiexma Yerobom heue. ¹⁴ Lheu khaing an Simiang Siyiex tak yaog simiang tix kaux son tix ka daux pui Isarelay pa sang tat ti tik doeh nyiexma Yerobom ka daux singaix heue. “Mawh yam mawx?” Nawh Cao ah nin, “Mawh yam in heue.” ¹⁵ Simiang Siyiex tak sivied ka pui Isarelay, kieh kix vuhvied awm gawng priem ka daux rawm mai tak reeig ti tik pui Isarelay khaing haktiex in pa hoik tawx Nawh Cao ka taxdu kix mai kieh prungprang ka plak toi rawm klawng Yufrethix kheu jao yuh kix rieang Asherax mai so kieh Simiang Siyiex songrhawm heue. ¹⁶ Nawh Cao tak tik vud ka pui Isarelay kheu phimap pa yuh Yerobom mai kieh pui Isarelay lud. ¹⁷ Moeng Yerobom yaog ti ing khaing tan, yam hoek nawh ka diang siviex veng Tiraza, kawm nyawm an hoik yum heue. ¹⁸ Pui Isarelay sipaung nawh mai yiiemdoe son nawh awm gumlox pa hoik kraï Simiang Siyiex ka kawncau tix cao jhai Ahiyax heue. ¹⁹ Pa yuh Yerobom khankix mai pa yuh nawh naing pa kuang nawh ka haktiex khankix hoik tiem ti deuh ka daux phuk lai been simiang Isarelay heue. ²⁰ Yerobom kuang ka haktiex tixnga ra num mai lauxlee tix tau mai taxdu nawh khankix mai kawm simex nawh Nadat deeh plud khaix nawh heue.

Rehobom Kuang Meung Yudax (2Been 12:1-16)

²¹ Rehobom kawm simex Sawlamon kuang meung Yudax, yam jah Rehobom ti kuang haktiex koe tixpon tix num mai kuang ka veng Yerusalem kao aliah num, veng pa hoik

laug Simiang Siyiex ti deuh khaing daux ceu pui Isarelaux mai sonsang deuh min ceukaux tix tan, miex nawh mawh Nema pui Amonix heue. ²² Pui Yudax khankix yuh ceu pa caoxcaig ka plak sivoie ngai Simiang Siyiex mai kix hoik kieh Nawh Cao songrhawm ka phimap pa yuh tix mai lheu khaing pa yuh taxdukixheue. ²³ Mai kix baux deeh sumdee pa lhaong khankix mai raog khaox khankix mai rieanggrang Asherax ka piang gawng piang lua pa lhaong ku mu mai ka greem khaox klai khankix ka son tix heue. ²⁴ Simex coh kaux khankix koe ka daux haktiex an, kix hawt yuh pa seeing brai pa yuh pui khankix pa hoik grheu Simiang Siyiex khaing sivoie pui Isarelaux heue. ²⁵ Yam kuang simiang Rehobom ka haktiex phuan num tix num, Shishak simiang Ejiptux hoek ti puing ka veng Yerusaliem heue. ²⁶ Yam rhim ti viex sinngao daux nyiex buan Simiang Siyiex mai sinngao nyiex haw simiang mai kraung kuceu ing mai tix, nawh baux viex kraung plah tiebtie khri pa yuh Sawlamon heue. ²⁷ Simiang Rehobom deeh plud ti yuh plah tiebtie tawng mai ap an ka cao kaing pau ju simiang, pa pau diang siviex nyiex simiang heue. ²⁸ Yam laig simiang ka nyiex buan Simiang Siyiex yam mawx angha, cao pau ju khankix viex kraung plah pa tiebtie hawt khaix nawh, kix deeh viex hoek priex ka daux lawg dee pau kix heue. ²⁹ Can kaing pa deuk mai pa hoik yuh Rehobom khankix mai khaing pa yuh nawh khankix hoik tiem ti deuh daux phuk lai been simiang pui Yudax ang mawh lie? ³⁰ Mai naing koe sinax Rehobom mai Yerobom jheengjheeng heue. ³¹ Rehobom lauxlee ti tau mai keeing tix mai sipaung tau mai taxdu nawh Davit ceukaux miex nawh mawh Nema pui Amawrix, Abijam kawn simex nawh deeh plud khaix nawh heue.

Abijam Kuang Meung Yudax (2Been 13:1-22)

15 Yam hoik kuang simiang Yerobom kawn simex Nebat ka haktiex kao daix num, Abijam jah ti kuang ka piang pui Yudax heue. ² Nawh kuang ka veng Yerusaliem loe num, ceukaux miex nawh mawh Makha kawn **14:10** 1Sim**14:26** 1Sim 10:16-17; 2Been 9:15-16. **15:4** 1Sim 11:36. **15:5** 2Sa 11:1-27. **15:6** 2Been 13:3-21. **15:12** 2Been 15:8-15.

sibun Apsalom heue. ³ Nawh lawng daux krax phimap pa hoik yuh keeing tix kuceu, rhawm nawh ang lai grumnaog ka Simiang Siyiex tix, awm rhawm taxdu nawh Davit heue. ⁴ Viang mawh nan, mawh kheu jhak Simiang Siyiex ka pakngai Davit, Simiang Siyiex tom tawx kaww ngu tix mu ka nawh ka veng Yerusaliem mai yaog kawn simex nawh plud khaix nawh mai pang veng Yerusaliem kauxcong son nawh heue. ⁵ Mawh kheu Davit yuh pa khaw ka plak sivoie ngai Simiang Siyiex mai ang veeh ti khaing lox tawm Nawh Cao glang singaix im ju nawh, lheu khaing grawng see Uriyax pui Hetax heue. ⁶ Naing hoik koe ka sinax Rehobom mai Yerobom glang singaix im ju nawh heue. ⁷ Can pa yuh Abijam mai kaing pa yuh nawh khankix hoik tiem ti deuh ka daux phuk lai been simiang pui Yudax heue. Mai naing koe sinax Abijam mai Yerobom heue. ⁸ Abijam lauxlee ti tau mai taxdu tix khankix mai sipaung ka veng Davit, khaix an Asa kawn simex nawh deeh plud khaix nawh heue.

Asa Kuang Meung Yudax (2Been 14:1-5, 15:16-19)

⁹ Yam hoik kuang Yerobom simiang Isarelaux haktiex tixnga num, Asa jah ti kuang ka piang pui Yudax heue. ¹⁰ Nawh kuang ka veng Yerusaliem tixpon tix num, ceukaux miex nawh mawh Makha kawn bun Apsalom heue. ¹¹ Asa yuh pa khaw ka plak sivoie Simiang Siyiex awm taxdu nawh Davit heue. ¹² Nawh grheu simex coh kaux khankix khaing daux haktiex mai yieh ti tik ka rieanggrang Asherax pa yuh taxdu nawh ti deuh khawmuik heue. ¹³ Nawh pluat miex tix Makha khaing pa mawh nangsimiang, kheu jao yuh nawh rieanggrang Asherax pa seeing brai son Asherax, Asa yieh rieanggrang Asherax pa yuh nawh mai gleeing ka praok rawm klawng Kidron heue. ¹⁴ Viang mawh nan, ka dee lhaong khankix ang nyang yieh tix, glang yam kawn im ju Asa rhawm nawh koe pa grumnaog ka Simiang Siyiex heue. ¹⁵ Nawh viex krax tan pa yuh keeing khankix, krax tan cie nawh, pa mawh khri, mau, kraung pa shiao tix khankix hoek ka daux nyiex buan Simiang Siyiex heue.

Asa Yuh Paoxpie Mai Benhadat (2Been 16:1-14)

¹⁶ Naing koe sinax Asa mai Basha simiang Isarelax glang singaix im ju kiex heue. ¹⁷ Basha simiang Isarelax hu puing ka meung Yudax mai sum ti deuh veng Rama sonsang ang kieh pui tix kaux kawx lih laig ka Asa simiang Yudax heue. ¹⁸ Asa teei mau mai khri pa kawn deuk khaing daux nyiex krao sinngao nyiex buan Simiang Siyiex, nyiex krao sinngao simiang mai ap ankix ka daux tawm taix kawncau nawh khankix mai Asa ploi kix hu ka Benhadat kawn simex Tabarimon, kawn simex Hezon, simiang Surix pa ot ka daux veng Damase ah nin, ¹⁹“Kieh ax yuh paoxpie sinax maix mai aux awm pa yuh keeing aux mai keeing maix ka paox tix heue. Jhak heue, Aux ploi pui hu tawx totaix pa mawh mau mai khri khankix, maix deeh yieh pa yuh paoxpie ka Basha simiang Isarelax, sonsang deeh yaog pui naing ti ing khaing aux heue.” ²⁰ Benhadat nghiet ka lox Asa mai nawh ploi cao kaing kranaing tix khankix hu puing ka veng pui Isarelax mai puing ka veng Iyon, Dan, Abelabietmakha mai baoh haktiex Khinirot tau mai baoh haktiex Napthalix khawmuik heue. ²¹ Yam mhong Basha ka ceu an, nawh ang lai sum veng Rama mai ing ot ka daux veng Tiraza heue. ²² Simiang Asa kieh pui krao pao ka daux meung Yudax khawmuik, ang lai via pui tix kaux kawx mai kieh kix don simaox khaing veng Rama mai khaox khankix pa hoik shiao Basha sonsang sum veng mai Asa deeh viexti sum veng Gebax pakoe kadaux meung pui Benyamin mai veng Mizapa tau ka an heue. ²³ Grawng kaing pa deuk mai can pa hoik yuh simiang Asa khawm riang rao nawh khankix mai can kaing pa yuh nawh mai veng pa hoik sum nawh khankix hoik tiem ti deuh ka daux phuk lai been simiang pui Yudax heue. Viang mawh nan, yam riex ju nawh, jhawm saux lih koe ka caong nawh heue. ²⁴ Asa lauxlee tix mai keeing nawh khankix mai sipaung nawh tau mai taxdu nawh khankix ka daux veng taxdu nawh Davit mai Yehoshaphat kawn simex nawh deeh plud ti kuang khaix nawh heue.

15:29 1Sim 14:10.

Krax Kuang Nadat

²⁵ Nadat kawn simex Yerobom yaog ti kuang ka piang pui Isarelax, yam kuang Asa simiang Yudax ka haktiex ra num mai nawh kuang ka piang pui Isarelax ra num heue. ²⁶ Nawh yuh pa caoxcaig ka plak sivoie ngai Siyiex mai lawng krax hu keeing nawh mai ka daux phimap pa kieh pui Isarelax yuh phimap heue. ²⁷ Basha kawn simex Ahiyax, khaing doeh nyiexma pui Isakha keud ti tiehfeen ka simiang Nadat mai Basha hoik pah ka nawh ka daux veng Gibeton veng cie pui Philitix, yam lailawm Nadat mai pui Isarelax khankix ka veng Gibeton heue. ²⁸ Basha pah nawh yum yam kuang simiang Asa ka meung Yudax loe num tix num mai nawh plud ti kuang khaix nawh heue. ²⁹ Yam mawh nawh simiang, nawh pah ka doeh nyiexma Yerobom khankix heue. Nawh ang prah kix im ju tix kaux kawx tom sidah yuh nawh kix lauxleeing awm gumlox pa hoik krao Simiang Siyiex ka kawncau tix Ahiyax pui veng Shilaw. ³⁰ Mawh kheu phimap Yerobom pa hoik lud nawh mai pa hoik kieh pui Isarelax khankix lud mai pa hoik so Simiang Siyiex pui Isarelax khankix songrhawm heue. ³¹ Grawng kaing pa deuk mai can pa hoik yuh Nadat khankix hoik tiem ti deuh ka daux phuk lai been simiang Isarelax khankix. ³² Naing koe sinax Asa mai Basha pa mawh simiang Isarelax glang singaix im ju kiex heue.

Krax Kuang Basha

³³ Yam hoik kuang Asa simiang Yudax ka haktiex loe num tix num, Basha kawn simex Ahiyax jah ti kuang ka piang pui Isarelax khankix ka daux veng Tiraza mai kuang haktiex tixnga pon num. ³⁴ Nawh yuh pa caoxcaig ka plak sivoie ngai Simiang Siyiex mai lawng daux krax pa hu Yerobom mai kieh pui Isarelax khankix lud hu daux krax phimap heue.

16 Gumlox Simiang Siyiex hoek ka Yehu kawn simex Hananix neraw ka Basha ah nin, ²“Aux yaog maix lih khaing daux phawng tiex mai kieh maix kuang ka piang pui Aux Isarelax khankix mai hoik lawng daux krax pa hu Yerobom mai kieh pui Aux Isarelax lud mai so Aux songrhawm ka phimap kix. ³Aux taktat ti

tik doeh nyiexma Basha mai Aux tak kieh doeh nyiexma maix khankix awm doeh nyiexma Yerobom kawn simex Nebat heue. ⁴Sox tak ih ka can pui Basha pa yum ka dauh veng mai sim raoma tak ih pui pa yum ka dauh tiagheue.”⁵Kaing pa deuk pa yuh Basha mai kaing pa hoik yuh nawh khankix mai riang rao nawh khankix hoik tiem ti deuh ka dauh phuk lai been simiang Isarelaux khankix heue. ⁶Basha lauxlee tix tau mai taxdu nawh khankix mai sipaung nawh ka dauh veng Tiraza mai kawn simex nawh Elax deeh plud ti kuang khaix nawh heue. ⁷Gumlox Simiang Siyiex hoek ka cao jhai Yehu kawn simex Hananix ka son Basha mai ka doeh nyiexma nawh kheu jao pa caoxcaig khankix pa yuh nawh ka plak sivoie ngai Simiang Siyiex, hoik kieh Nawh Cao songrhawm ka kaing pa yuh nawh ka taix tix awm payuh doeh nyiexma Yerobom kheu jao hoik pah nawh doeh nyiexma kix yum heue.

Krax Kuang Elax Mai Zimarix

⁸ Yam hoik kuang Asa simiang Yudax ka haktiex tixnga liah num, Elax kawn simex Basha deeh jah ti mawh simiang ka piang pui Isarelaux mai kuang ka dauh veng Tiraza ra num heue. ⁹ Kawncau nawh Zimarix pa mawh cao kaing ting pa kuang linglawx naing brung nawh tix plak, keud ti deeh tiehfeen ka nawh yam ot nawh ka dauh veng Tiraza mai yam nyaux nawh tom yoek tix dauh nyiex Aza, cao pa kuang ka dauh nyiex haw dauh veng Tiraza, ¹⁰ mai Zimarix laig mug nawh ka dauh nyiex mai pah nawh yum yam kuang simiang Asa ka meung Yudax tixnga aliah num mai plud ti kuang haktiex nawh heue. ¹¹ Yam jah nawh ti kuang ka haktiex mai ngawm ka piang dangngeung mai nawh pah doeh nyiex Basha khawmuik, nawh ang lai prah simex tix kaux kawx mai khawm paoxnyiex mai puxaik nawh khawmuik. ¹² Zimarix doeh nyiexma Basha, awm gumlox Simiang Siyiex, pa kraih Nawh Cao ka cao jhai Yehu ka son Basha heue. ¹³ Mawh kheu phimap pa yuh Basha mai phimap kawn simex nawh Elax mai pa lud kix, pa hoik kieh pui Isarelaux koe phimap mai kieh Simiang Siyiex pui Isarelaux songrhawm kheu rieangrang Asherax pa

krub kix. ¹⁴ Grawng kaing pa deuk mai pa hoik yuh Elax mai kaing pa yuh nawh khankix hoik tiem ti deuh ka dauh phuk lai been simiang Isarelaux heue.

Zimarix Kuang Meung Isarelaux

¹⁵ Yam hoik kuang Asa simiang haktiex Yudax tixnga aliah num, Zimarix kuang ka dauh veng Tiraza aliah ngaix mai pui Isarelaux khankix yuh tab mai rawb ka veng Gibeton veng pui Philitiex heue. ¹⁶ Pui khankix pa yuh tab mhong ka grawng tiehfeen Zimarix mai ka hoik pah simiang yum, mawh kheu nan, pui Isarelaux khankix yaog Omrix pa mawh cao kaing naing ting mawh simiang ka piang Isarelaux dauh singaix an ka dee bang kix heue. ¹⁷ Omrix mai pui Isarelaux pa ot tau mai nawh khawmuik lih hu khaing veng Gibeton mai kix lailawm ka veng Tiraza heue. ¹⁸ Yam yaox Zimarix ka pon rhim kix ka veng, nawh laig ka dauh nyiex haw mai gleeing nyiex haw ka piang tix mai nawh yum tan, ¹⁹ kheu phimap pa caoxcaig yuh nawh ka plak sivoie ngai Simiang Siyiex mai lawng dauh krax hu Yerobom mai kieh pui Isarelaux khankix lud heue. ²⁰ Grawng kaing pa deuk Zimarix mai can kaing pa hoik tiehfeen nawh, hoik tiem ti deuh ka dauh phuk lai been simiang Isarelaux khankix heue.

Krax Kuang Omrix

²¹ Khaix an, pui Isarelaux goih tix ra plak tix plak hawt khaix Tibanix kawn simex Ginat, sonsang yaog kix nawh mawh simiang mai tix plak hawt khaix Omrix heue. ²² Viang mawh nan, pui pa hawt khaix Omrix pex ka pui pa hawt khaix Tibanix kawn simex Ginat mawh kheu nan, Tibanix yum mai Omrix yaog ti kuang ka haktiex heue. ²³ Yam hoik kuang Asa simiang Yudax ka haktiex tixngoe tix num, Omrix yaog ti kuang ka piang pui Isarelaux kao ra num, nawh kuang ka dauh veng Tiraza liah num heue. ²⁴ Nawh liag gawng Samarix khaing Shemarax, ka mau ra talantan mai sum veng ka piang gawng an mai kok ceukaux veng an mawh Samarix hawt ceukaux Shemarax cao gawng an heue. ²⁵ Omrix yuh pa caoxcaig sivoie ngai Simiang Siyiex nielheu yuh khaing pui pa koe sivoie nawh khankix heue. ²⁶ Mawh kheu nawh lawng

daux krax Yerobom kawn simex Nebat mai phimap pa yuh nawh kieh pui Isarela^x khankix lud mai so Simiang Sⁱyiex, Sⁱyiex pui Isarela^x songrhawm kheu rieanggrang Asherax pa krub kix heue. ²⁷ Grawng kaing pa deuk mai can kaing pa yuh Omrix mai riang rao pa jhi nawh khankix hoik tiem ti deuh ka daux phuk lai been simiang Isarela^x heue. ²⁸ Omrix lauxlee ti tau mai taxdu nawh khankix, kix sipaung nawh ka daux veng Samarix khaix an, kawn simex nawh Ahap deehplud ti kuang khaix nawh heue.

Krax Kuang Ahap

²⁹ Yam hoik kuang Asa simiang Yudax ka haktiex tixngoe daix num, Ahap kawn simex Omrix jah ti kuang ka piang pui Isarela^x khankix mai nawh kuang ka piang Isarela^x ka daux veng Samarix tixnga ra num heue. ³⁰ Ahap kawn simex Omrix nielheu yuh pa caoxcaig plak sivo^e ngai Simiang Sⁱyiex, khaing pui pa koe sivo^e nawh heue. ³¹ Pa lawng nawh ti hu ka daux phimap pa yuh Yerobom kawn simex Nebat, nawh sawn mawh pa iak son tix kheu nawh teei ti moeng Yezabelax kawn sibun Etabalax simiang Sidom, nawh hu yuh kaing jhaw Balax mai krub ka heue. ³² Nawh sum khu dee tan tix lhang ka son Balax ka daux nyiex buan sⁱyiex Balax pa hoik sum nawh ka daux veng Samarix heue. ³³ Ahap yuh rieanggrang Asherax heue. Ahap nielheu yuh pa songrhawm Simiang Sⁱyiex, Sⁱyiex pui Isarela^x, lheu khaing krax songrhawm pa yuh simiang Isarela^x khankix pa koe sivo^e nawh heue. ³⁴ Ka daux bawg yam kuang nawh ka haktiex Hilax pui veng Betelax hoik deeh sum veng Yerikho, yam kaw nawh num riah veng an, kawn Ai nawh Abiram yum mai yam jung nawh pang siviex kawn simex ghoik nawh Segub yum awm gumlox pa hoik kraⁱ Simiang Sⁱyiex ka Yawsux kawn simex Nun heue.

17 *Eliya^x Krai Lox Jhai*

Eliya^x pui veng Tishabix pa ot meung Gilat ah nin ka Ahap, “Awm im ju Simiang Sⁱyiex, Sⁱyiex pui Isarela^x pa krub aux kah, phan ang mawh khaing gumlox Aux, rawm ciex mai rawm lhiex tak ang koe ka daux **16:34** Yaw 6:26. **17:1** Jas. 5:17. **17:9** Luk 4:25-26.

num in heue.” ² Gumlox Simiang Sⁱyiex lih hoek ka nawh ah nin, ³ “Lih hu khaing tin mai veeh ti hu ka plak toh mai mox tix ka praok rawm klawng iak Kherit plak toirawm klawng Yawdan heue. ⁴ Maix tak nyaux rawm klawng iak an mai Aux tawx lox ka lak, sonsang hoek tawx maix ih pa ih tan heue.” ⁵ Mawh kheu nan, nawh lih hu mai yuh awm gumlox pa tawm Simiang Sⁱyiex ka nawh, nawh hu mai ot ka praok rawm klawng iak Kherit, plak toi rawm klawng Yawdan heue. ⁶ Lak khankix viex blah mai nex hoek ka nawh, ponngawb mai ponbo mai nawh nyaux rawm klawng iak an heue. ⁷ Khaix an, rawm klawng iak an hit, jao ang lhiex lai lih ka daux haktiex an heue.

Eliya^x Mai Miexmai

⁸ Gumlox Simiang Sⁱyiex hoek ka nawh ah nin, ⁹ “Kaoh hu ka veng Zarephat, pa mawh veng pui Sidom mai ot tan, Aux tawm lox ka miexmai tix kaux pa ot tan sonsang tawx maix ih heue.” ¹⁰ Nawh kaoh hu ka veng Zarephat mai yam hoek nawh ka siviex veng, nawh ya^{ox} ka miexmai tix kaux pa kraix khix tan, nawh kok miexmai an ah nin, “Viex aux nyaux rawm ka daux kaw^k ce^eix heue.” ¹¹ Yam sang hu sibun an ti teei rawm, nawh ba^{ox} kok ka sibun an ah nin, “Viex aux ih blah tix shiag ka daux taix maix ce^eix heue.” ¹² Sibun an pawk ah nin, “Awm pa im ju Simiang Sⁱyiex mai aux ang lai koe khlawp blah, mawh ngie phawng ga^{ox} been tix jhawp daux aw mai rawm bee ce^eix ka daux ngoi, yam in aux kraix khix ra nge sonsang khre pa ih son tix mai son kawn simex aux, ih mai yum khaix heue.” ¹³ Eliya^x ah nin ka sibun an, “Paw khi ka, hu khre awm pa ah maix, yuh khli^ep blah iak tix mu phaoka mai viex hoek ka aux, khaix an yuh son maix mai kawn simex maix heue. ¹⁴ Simiang Sⁱyiex pui Isarela^x ah nin, “Phawng ga^{ox} daux aw tak ang chix uik mai bee daux ngoi tak ang chix dieh tom hoek sidah kieh Simiang Sⁱyiex rawm lhiex lih ka piang haktiex heue.” ¹⁵ Sibun an hu yuh awm pa kraⁱ Eliya^x, Eliya^x mai nawh khawm kawn nyiexma nawh khankix, ya^{ox} ti ih tom rheeng singaⁱx heue. ¹⁶ Phawng ga^{ox} daux aw ang chix uik mai bee

daux ngoi kawx ang chix dieh awm gumlox pa hoik krai Simiang Siyiex ka Eliyax heue. ¹⁷ Khaix an, kawm simex miexmai an kied saux mai nawh yum heue. ¹⁸ Sibun an ah nin ka Eliyax, “Pui Siyiex eue, mawh koe ceu payuh maix patix kaaux lie? Mawh hoek maix kaaux sonsang doh keud aux ka phimap tix mai sonsang pah ka kawm simex aux lie?” ¹⁹ Nawh deeh ah nin ka sibun an, “Tawx kawm simex maix ka aux heue.” Nawh teei kawm simex an lih khaing naok sibun an mai kliien nawh haok daux lawg plak piang dee peung tix mai deuh nawh ka piang ku heue. ²⁰ Nawh kokyo ka Simiang Siyiex ah nin, “Simiang Siyiex aux eue, mawh viex Maix ceu pa caox hoek ka piang miexmai, nyiex pa peung aux mai pah ka kawm simex nawh lie?” ²¹ Nawh nyat tokaux tix ka piang kawm nyawm an loe bawg mai kokyo ah nin, “Simiang Siyiex, Siyiex aux eue, kieh khuan kawm nyawm in deeh hoek ka daux nawh heue.” ²² Simiang Siyiex mhong lox kok yo Eliyax mai khuan kawm nyawm an deeh hoek ka daux nawh mai nawh deeh in heue. ²³ Eliyax kliien kawm nyawm an lih khaing lawg plak piang mai hoek daux nyiexmai ap kawm nyawm an ka miex nawh, Eliyax ah nin, “Jhak kawm simex pax hoik im phao heue.” ²⁴ Khaix an, sibun an deeh ah nin ka Eliyax, “Yam in aux tawng mawh maix pui Siyiex mai gumlox Simiang Siyiex pa kaoh khaing daux jheeh maix mawh pa mawh pa meh heue.”

18 *Gumlox Eliyax Ka Ahap*
 Khaix hoik rheeng singaix bawg yam, gumlox Simiang Siyiex deeh hoek ka Eliyax yam naog loe num tix num ah nin, “Hu mai jhi tokaux maix ka Ahap mai Aux tak kieh lhiex lih ka piang haktiex heue.” ² Mawh kheu nan, Eliyax hu jhi tokaux tix ka Ahap heue. Yam in sibhawm praux kied kin sigrien sigre ka daux veng Samarix. ³ Ahap kok ka Obadix cao kaing pa kuang ka daux nyiex haw. Obadix mawh pui pa kied lhatgraung ka Simiang Siyiex heue. ⁴ Yam grheu Yezabelax ti tik ka cao jhai Simiang Siyiex khankix, Obadix teei cao jhai tix yieh kaux mai mox kix ka daux rang tix dah tixphuan kaux mai eei kix ka blah mai rawm heue. ⁵ Ahap ah ninka

Obadix, “Hu ka daux haktiex dee lih rawm keut mai ka dee koe rawm klawng iak khankix, ha ex sang yaox dee koe rib sonsang eei ka brung law klawd kah mai son ang tobrie som nai tix mu kawx heue.” ⁶ Ahap mai Obadix goih paox tix hu sawg ka haktiex koe rib tix kaux tix plak heue. ⁷ Yam kawm hu Obadix ka krax hu nawh, Eliyax caong rieb tipub nawh mai Obadix ponce ka nawh mai nawh gup ngai tix ah nin, “Mawh maix simiang aux Eliyax lie?” ⁸ Eliyax pawk ah nin ka nawh, “Mawh aux heue. Hu mai krai simiang maix mhong kah ot Eliyax tin heue” ⁹ Obadix ah nin, “Mawh hoik koe ceu pa lud aux ka pa tix maix lai ap kawncau tix ka daux tawm taix Ahap, sonsang pah nawh ka aux lie?” ¹⁰ Awm im ju Simiang Siyiex maix, dee ot pui mawx angah mai haktiex mawx angah, dee ang cao simiang aux ploih pui hu sawg ka maix, ang koe ti dah kawx maix hoik kieh pui haktiex tiextu grawng ang kix yaox ka maix heue. ¹¹ Yam in maix lai ah nin, hu mai krai cao simiang maix mhong, “Eliyax ot tin heue.” ¹² Yam hoik hu aux khaing maix phan khuan Simiang Siyiex viex maix hu ka dee ang aux tawng, glang yam hu krai aux ka Ahap mai phan ang yaox ka maix nawh tak pah ka aux, mawh kheu aux kawncau maix hoik dawg lhat ka Simiang Siyiex tom yam iak tix heue. ¹³ Ang aux hoik krai grawng an ka cao simiang tix, yam pah Yezabelax ka cao jhai Simiang Siyiex khankix mai grawng pa hoik mox aux cao jhai Simiang Siyiex tix yieh kaux, ka daux rang tix dah tixphuan kaux mai hoik eei kix ka blah mai rawm ang mawh lie? ¹⁴ Yam in maix lai ah nin, “Hu krai cao simiang maix mhong, Eliyax ot tin. Mai nawh tak pah aux heue.” ¹⁵ Eliyax ah nin, “Awm im ju Simiang Siyiex Cao krunaing raoma pa krub aux kah, aux tak jhi tokaux tix ka nawh daux in singaix tete heue.” ¹⁶ Mawh kheu nan, Obadix hu krai ka Ahap mai Ahap lih rieb ka Eliyax heue. ¹⁷ Yam yaox Ahap ka Eliyax, Ahap ah nin ka nawh, “Hoik mawh maix pa tuktiak ka pui Isarelix lie?” ¹⁸ Eliyax deeh pawk ah nin, “Aux ang mawh pa tuktiak ka pui Isarelix, mawh maix mai doeh nyiexma keeing maix pa tuktiak tikvud lox tawm pingnyap Simiang

Siyiex mai hawt khaix siyiex Balax heue. ¹⁹Yam in ploi pui hu khrawm pui Isarelaix mai cao jhai Balax pon yieh tixphuan kaux mai cao jhai Asherax pon yieh kaux, pa sawm tau ka pheen Yezabelax khawmuik hoek ka aux ka gawng Khamelax heue.”

Eliyax Pex Ka Cao Jhai Balax Khankix

²⁰Ahap ploi pui hu khrawm ka pui Isarelaix khawmuik mai cao jhai khankix hoek ka gawng Khamelax. ²¹Eliyax hoek ka pui khawmuik ah nin, “Mawh kawn kukax rhawm pex sinax beenli in ra ceu miex grheeng lie? Phan Simiang Siyiex mawh Siyiex hawt khaix Nawh Cao mai phan Balax mawh siyiex, hawt khaix nawh heue. “Pui khankix ang pon pawk lox nawh tix gum kawx heue. ²²Khaix an, Eliyax ah nin ka pui khankix, “Cao jhai Simiang Siyiex deuk ngie aux nongnong, viang mawh nan, cao jhai Balax kawn koe pon yieh tixphuan kaux heue. ²³Kieh kix tawx mawie mhaing ra mu ka ex, kieh kix laug son tokaux tix tix mu mai pat lih mawh shiag mawx shiag an deuh ka piang khix, viang mawh nan, paw vi sau ngu mai aux tak khre mawie tix mu deuh ka piang khix mai ang sau ngu ka heue. ²⁴Pex kok ceukaux siyiex tix mai aux kawx tak kok ka ceukaux Simiang Siyiex. Siyiex pa pawk ka ngu, Nawh tak rug mawh Siyiex heue. “Pui khankix pawk lox ah nin, “In mawh pa mhawm heue.” ²⁵Eliyax ah nin ka cao jhai Balax khankix, “Laug mawie son pex tix mu mai khre ka son pex sivoe mawh kheu mawh pex pui hun mai kok ka ceukaux siyiex pex, viang mawh nan, paw vi sau ngu heue.” ²⁶Kix teei mawie mhaing an pa hoik tawx ka kix mai khre ka an mai kok ka ceukaux Balax jah ponngawb tom hoek jung singaix ah nin, “Balax eue, nghiet lox yix liak! “viang mawh nan, lox pa plak jhi tittix ang koe mai ang koe cao papawk, kix graoh hawt vungviang khu dee tan tix heue. ²⁷Yam hoek yam jung singaix Eliyax ah lox ang cee ang cak ka kix ah nin, “Yo lox pex tom ting mawh kheu mawh nawh siyiex, nawh kawn keud rhawm tix, phan ang mawh nan, nawh kawn nie kaing phan ang mawh nan, nawh kawn hu krax phan

18:31 Yam 32:28; 35:10. **18:42-45** Jas. 5:18.

ang mawh nan, nawh kawn laig it pleue, pex khawti so nawh kaoh heue. ²⁸Kix baox nie yo lox sinum mai pat tokaux tix ka vaid ka rhiem lawm tom lih nham awm hoik koe been kix heue. ²⁹Yam luan jung singaix, kix ah lox jhai tom hoek plak bo yam yuh kix krax tan pa appong viang mawh nan lox tittix ang koe mai ang koe cao pawk, ang koe cao nghiet heue. ³⁰Eliyax ah nin ka pui kukaux, “Hoek dex aux, “pui kukaux kawx hoek dex nawh mai nawh cox khu dee tan Simiang Siyiex pahoik grhup heue. ³¹Mai Eliyax teei simaox kao ra lon awm koe doehru kawn simex Yakop pui pa hoek gumlox Simiang Siyiex kah ah nin, “Ceukaux maix tak mawh Isarelaix heue.” ³²Nawh sum khu dee tan ka lon simaox inkix ka daux ceukaux Simiang Siyiex mai nawh kaong rawng hawt rawbrim khu dee tan son pa kub simie nghox ra glawm heue. ³³Nawh grux khix mhawmmhawm mai pat nex mawie mhaing shiag mawx shiag an mai deuh ka piang khix ah nin, “Sau rawm naog ka daux pung pon mu mai lhauk ka piang krax tan pa gleeing mai piang khix khankix heue.” ³⁴Khaix an nawh ah nin, “Baoux lhauk ra bawg” mai kix kawx baoux lhauk ra bawg, nawh baoux ah nin, “Baoux lhauk loe bawg” mai kix kawx baoux lhauk loe bawg heue. ³⁵Mai rawm hoik la hawt rawbrim khu dee tan mai nawh baoux deeh sau rawm naog ka daux rawng heue. ³⁶Yam hoek bawgyam tan krax tan plak bo, cao jhai Eliyax hoek dex ah nin, “Simiang Siyiex, Siyiex Abraham, Icac mai Isarelaix eue, daux singaix kieh pui khankix tawng ka mawh Maix Siyiex pui Isarelaix mai ka mawh aux kawncaw Maix Cao ka pa yuh aux in awm gumlox Maix Cao heue. ³⁷Simiang Siyiex eue, nghiet ka lox aux sonsang tawng pui khankix ka mawh Maix Simiang Siyiex mai tawng ka mawh Maix Cao pa kieh kix deeh veeh rhawm tix heue. ³⁸Khaix an, ngu Simiang Siyiex lih mai gleeing ka krax tan pa gleeing mai khix, simaox mai phawng tiex khankix kroh yuh rawm ka daux rawng heue. ³⁹Yam yaoux pui ka ankix gup ngai tix ah nin, “Simiang Siyiex mawh Siyiex heue. Simiang Siyiex mawh Siyiex heue.” ⁴⁰Eliyax

ah nin ka kix, "Giex ka cao jhai Balax khankix paw kieh bhoek tix kaux kawx," Mai kix giex ka kix, Eliyax viex ti hu pah kix ka rawm klawng Kishon heue.

Eliyax Rawgbuan Son Lhiex

⁴¹Eliyax ah nin ka Ahap, "Haok plak piang ih mai nyaux, mawh kheu sinum praix lhiex ting sang lih heue." ⁴²Ahap haok ka piang sonsang ih nyaux mai Eliyax kawx haok ka choek gawng Khamelax mai nawh gup tix ka piang tiex mai deuh pakngai tix ka sinax ngawng tix⁴³ mai ah nin kawncanawh, "Kaoh mai jhak ka plak rawm sigrit sigra," Nawh kaoh jhak ah nin, "Ang koe tittix tan heue." Mai Eliyax ah nin, "Baoh hu jhak aliah bawg heue." ⁴⁴Yam hoek aliah bawg nawh ah nin, "Paiawm iak pa awm taix pui hoik haok khaing dauw rawm sigrit sigra" mai nawh ah nin ka kawncau tix, "Hu kraik ka Ahap, khre ka linglawx brung maix mai lih hu sivoe ang lhiex nyang lih son ang maix sang lan ka lhiex heue" ⁴⁵Daux tivud, paiawm lung mai bhaung lih khaing raoma, lhiex ting kawx lih mai Ahap brug linglawx brung tix hu ka veng Yezerelax heue. ⁴⁶Taix Simiang Siyiex hoek ka piang Eliyax mai nawh nhawt nyoi tix to hoek sivoe Ahap ka diang sivieix laig dauw veng Yezerelax heue.

19 *Eliyax Klawd Khaing Yezebelax*

Ahap deeh kraik grawng pa hoik yuh Eliyax khawmuik ka Yezebelax mai grawng pa pah nawh ka cao jhai khankix ka vaid heue. ²Yezebelax ploik cao cau hu ah nin ka Eliyax, "Ka dauw bawgyam in pasax, phan aux ang kieh ju maix awm ju cao jhai an khankix, kieh Siyiex nielheu ciyang ka aux heue." ³Yam mhong Eliyax ka lox an nawh kied lhat mai to sonsang klawd ju tix mai hoek ka veng Berashebax meung Yudax mai nawh prah kawncau tix tan heue. ⁴Viang mawh nan, nawh hu ka dauw tiag been tix ngaix krax mai nawh hoek ngawm greem khaox gix ia mai nawh rawgbuan sonsang yum tix ah nin, "Ding heue, Simiang Siyiex eue teei ju aux yam in liak! Mawh kheu aux ang blon mhawm khaing taxdu aux khankix **19:10, 14** Ro 11:3. **19:15** 2Sim 8:7-13. **19:16** 2Sim 9:1-6. **19:18** Ro 11:4.

heue." ⁵Nawh lhiak it ka greem khaox gix ia, kawncau Siyiex tix kaux hoek teeh ka nawh ah nin, "Kaoh mai ih heue." ⁶Nawh maong ti jhak mai yaox ka blah tong ka ngu tix khlawp mai singiien rawm tix mu koe plak kaing gaong nawh, mawh kheu nan, nawh teei ti ih mai nyaux mai baoh lhiakit heue. ⁷Mai kawncau Simiang Siyiex baoh hoek ra bawg tix bawg mai teeh ka nawh ah nin, "Kaoh mai ih, mawh kheu krax pa hu maix kawm kied singai heue." ⁸Nawh kaoh mai ih nyaux mai nawh koe riang rao ka pa ih an mai pon hu tixpon ngaix tixpon sawm, tom hoek nawh ka Hawrax pa mawh gawng Siyiex heue. ⁹Nawh hoek dauw rang mai laig peung tan dauw sawm an, jhak heue, gumlox Simiang Siyiex bleeh ka nawh ah nin, "Eliyax eue, yuh maix patix tin?" ¹⁰Nawh deeh ah nin, "Aux hoik kied sau riang rao tix plak Simiang Siyiex, Siyiex Cao krunaing raoma, mawh kheu pui Isarelax hoik tikvud ka sijax mukheu Maix Cao mai hoik yieh khu dee tan Maix Cao mai hoik pah ka cao jhai Maix Cao ka lawm vaid, mawh ngie aux pa deuk nongnong, kix sawg ti teei ju aux heue." ¹¹Nawh Cao ah nin, "Hu mai cung ka piang gawng sivoe Simiang Siyiex heue." Simiang Siyiex tak lailing mai bhaung ting phlu ka gawng khankix mai kieh simaox max phawng ka plak sivoe Simiang Siyiex, viang mawh nan, Simiang Siyiex ang ot ka dauw bhaung mai khaix uik hoik bhaung, kla reem tok, viang mawh nan, Simiang Siyiex ang ot ka dauw kla reem ¹²mai khaix hoik tok kla reem koe ngu, viang mawh nan, Simiang Siyiex ang ot ka dauw ngu mai khaix ngu koe lox kawie sikah heue. ¹³Yam mhong Eliyax ka lox an, nawh tawb ngai tix ka sibex tix mai lih cung ka moing rang mai lox hoek ka nawh ah nin, "Eliyax eue, yuh maix patix tin?" ¹⁴Nawh deeh ah nin, "Aux hoik kied sau riang rao tix ka son Simiang Siyiex, Siyiex Cao krunaing raoma, mawh kheu pui Isarelax hoik tikvud sijax mukheu Maix Cao mai yieh khu dee tan Maix Cao mai pah ka cao jhai Maix Cao khankix ka lawm vaid, mawh ngie aux pa kawm deuk nongnong mai kix hoik sawg ti teei ka ju aux heue." ¹⁵Simiang Siyiex ah nin ka nawh, "Hu heue,

deeh ing krax daux tiag Damase mai yam hoek maix groi bee ka piang Hazelax mai yaog nawh mawh simiang Surix heue. ¹⁶ “Maix tak baoux groi bee ka piang Yehu kawn simex Nimshi mai yaognawh mawh simiang Isarelix maix tak baoux groi bee ka piang Elishie kawn simex Shaphat pui veng Abelamehawla mai yaog nawh plud cao jhai tang maix heue. ¹⁷ Can pui pa glawd khaing lawm vaid Hazelax khankix, Yehu tak pah kix yum mai can pui pa glawd khaing lawm vaid Yehu khankix, Elishie tak pah kix yum heue. ¹⁸ Viang mawh nan, aux tak prah ti kieh pui deuk aliah rheng kaux ka daux pui Isarelix pa ang sax gruxngawng krub ka Balax mai jheeh pa ang sax ngheet ka nawh heue.

Elishie Hawt Khaix Eliyax

¹⁹ Mawh kheu nan, Eliyax lih hu khaing tan mai sipub ka Elishie kawn simex Shaphat pa thai kaung ka mawie kao ra brawm ka plak sivoe nawh mai nawh ot plak khaix mawie kao ra klawm an, khaix an Eliyax hu hawt praok nawh tan mai taing sibex lang jung tix ka piang nawh heue. ²⁰ Nawh prah mawie tix khankix mai hawt khaix Eliyax ah nin, “Kieh aux ing ngheet ka miex keeing tix ha, khaix an aux tak hawt maix heue. “Eliyax deeh ah nin ka Elishie, “Ing heue mai deeh hoek, mawh yuh aux patix ka maix?” ²¹ Elishie deeh veeh ti ing khaing nawh mai pah mawie an tix brawm mai ngaik nex mawie ka kraung thai mai tawx pui khankix ih, khaix an, nawh kaoh mai hawt khaix Eliyax mai yuh kaing tau mai nawh heue.

20 *Grawng Som Pui Surix Ka Ahap*

Benhadat simiang Surix khrawm kranaing tix mai simiang tix ngoe ra kaux rom ti tau mai nawh, khawm pui naing brung mai linglawx naing brung, nawh hu lailawm ka veng Samarix mai yuh naing ka veng an heue. ² Khaix an nawh ploi pui cau khankix hu ka Ahap simiang Isarelix ka daux veng ah nin ka nawh, “Benhadat ah yuh nin, ³ mau khri maix mawh cie aux, moeng pa mhawm grang maix khankix mai kawn praix maix khankix kawx mawh cie aux heue.” ⁴ Simiang Isarelix pawk ah nin, “Simiang aux eue, awm pa ah mai can pa koe aux

aux khankix mawh cie maix heue.” ⁵ Pui cau khankix deeh hoek ah nin, “Benhadatah yuh nin, aux ploi pui hu ah nin ka maix, ap mau khri maix mai moeng kawn maix khankix ka aux heue.” ⁶ Bawgyam in pasax aux tak ploi kawncau tix khankix hoek khrieh daux nyiex maix mai nyiexma kawncau maix khankix mai can pa mhawm ka ngai maix khankix kix tak viex hu khaing maix heue. ⁷ Khaix an simiang Isarelix kok ka kuad riex ju daux haktiex tix ah nin, “Yam in keud pex yaoux mai jhak pui in, sawg ti yuh krax kharhawm ka ex, mawh kheu nawh ploi pui teei moeng aux mai kawn praix aux mai mau khri aux khankix, aux ang thiang heue.” ⁸ Kuad riex ju mai pui khankix ah nin ka nawh, “Paw ngheit mai paw khawrhawm ka heue.” ⁹ Ahap deeh ah nin ka pui cau Benhadat khankix, “Krai simiang cao simiang aux mhong, can pa hoik tawm maix ka kawncau tix bawg phaoka, aux tak yuh, phan mawh ceu in aux ang pon yuh heue.” Pui cau an lih hu mai viex lox an ka nawh heue. ¹⁰ Benhadat baoux ploi pui hu ka nawh ah nin, “Phan phawng tiex ka daux veng Samarix kub tix kaux tix jhawp ka son pui pa hawt khaix aux, kieh siyiex khankix yuh pa nielheu kin ka piang aux heue.” ¹¹ Simiang Isarelix pawk lox ah nin, “Krai ka nawh paw kieh pui ceep kraung naing yaw ka tokaux tix awm pui pa peek kraung naing ceep tix heue” ¹² Yam mhong Benhadat ka an, caw yam nyaux nawh plai mai cub simiang ka daux nyiex bang, nawh tawx lox ka kawncau tix khankix, “Khrierien tix” mai kix khre rien tix sonsang puing ka veng heue. ¹³ Cao jhai tix kaux hoek ka Ahap simiang Isarelix, “Simiang Siyiex ah nin, mawh hoik yaoux maix cub pui pa kied hun khankix lie? Jhak heue, aux tak ap kix ka daux taix maix in singaix maix tak tawng mawh Aux Simiang Siyiex heue.” ¹⁴ Ahap deeh ah nin, “Sang ap ka pui mawx?” Mai kawncau an krai, “Simiang Siyiex ah yuh nin, mawh khaing cao kaing pui awn ju daux kien haktiex inkix heue.” Ahap baoux ah nin, “Mawh pui mawx pa sang bung tix puing naing lie?” mai kawncau deeh pawk, “Mawh maix heue.” ¹⁵ Nawh simin cao kaing pa kawn awm ju

khankix pa kaoh khaing daux kien haktiex nawh koe ra yieh tixngoe ra kaux, khaix pui an khankix, nawh baoux simin pui Isarelix khawmuik koe aliah rheng kaux heue. ¹⁶ Kix lih yam jung singaix, viang mawh nan, Benhadat mai pa teem ka nawh tixngoe ra kaux, kawm yoek ka plai ka daux nyiex bang heue. ¹⁷ Pui awn ju daux kien haktiex khankix lih sivoe, Benhadat ploi cao jiang khankix hu mai kix ing krai ka nawh ah nin, "Pui khankix lih hoek khaing veng Samarix heue." ¹⁸ Nawh ah nin, "Phan kix lih hoek son krax pa nhim angah, sonsang puing naing angah giex im kix heue." ¹⁹ Khaix an, cao kaing pui pa kawm awn ju daux kien haktiex ankix lih khaing daux veng mai cub krunaing hawt khaix kix heue. ²⁰ Kix tang pah ka pui naing tix kaux taw tix kaux kukaux, mawh kheu nan, pui Surix to mai pui Isarelix pheet ka kix, viang mawh nan, Benhadat simiang Surix pon brung brug tix mai pui naing brung nawh khankix to ti glawd heue. ²¹ Simiang Isarelix lih puing ka pui naing brung mai ka pui naing linglawx brung khankix mai kix pah pui Surix yum tomnie heue. ²² Khaix an, cao jhai hoek ka simiang Isarelix ah nin ka nawh, "Hu kieh riang rao maix kauxcong, een ti tawng mai jhak ka pa sang khaw maix ti yuh, mawh kheu simiang Surix tak deeh hoek ti puingyam sidah num sax heue.

Pui Surix Deeh Baoux Som

²³ Kawncau simiang Surix khankix ah nin ka nawh, "Siyiex kix mawh siyiex gawng, mawh kheu nan, kix tom ting riang khaing ex, viang mawh nan, phan ex deeh baoux puing kix ka daux lung phan yuh nan, ex tak ting riang khaing kix tete heue. ²⁴ Khaw ti yuh nin, pluat cub simiang kukaux khaing ara kix mai deeh yaog cao kaing naing khankix plud dee ot kix, ²⁵ sawg pui pa sang deeh plud pui pa hoik yum mai pui naing brung son pui naing brung, linglawx brung son linglawx brung, khaix an ex tak deeh puing kix ka daux tong, ex tak nie ting riang khaing kix tete heue." Nawh nghiet lox mai hawt ti yuh heue. ²⁶ Yam hoik sidah num Benhadat deeh simin pui Surix mai nawh haok ka veng Aphiet sonsang puing ka pui

Isarelix heue. ²⁷ Pui Isarelix simin pui naing mai tawx priex ih kix mai hu puing ka kix, pui Isarelix bang ti ot ka plak sivoe kix awm phung kawm pexra cub, pui Surix hoik naog ka haktiex khawm beu heue. ²⁸ Khaix an pui Siyiex tix kaux hoek dex ah nin ka simiang Isarelix, "Simiang Siyiex hoik ah nin kheu jao hoik ah pui Surix nin, Simiang Siyiex mawh Siyiex gawng mai Nawh Cao ang mawh Siyiex daux lung, mawh kheu nan, Aux tak ap pui tomnie ka daux taix maix, maix tak tawng ka mawh Aux Simiang Siyiex heue." ²⁹ Kix bang ti ot see paoux tix aliah ngaix, yam hoek ka daux aliah ngaix kix ralai puing ka paoux tix mai pui Isarelix pah pui naing caong Surix tix sien ka daux tix ngaix khaing heue. ³⁰ Pui pa kawm deuk to ka daux veng Aphiet, khaix an guh veng grhup ka piang pui pa kawm deuk ra mheen aliah rheng kaux, Benhadat to mai laig ka daux veng mai mox tix ka daux lawg heue. ³¹ Mai kawncau nawh khankix ah nin ka nawh, "Jhak heue, yam in, ex mhong grawng simiang Isarelix mawh simiang pa koe krax cauxrhawm, kieh ex vien nyoi tix ka chee rhix mai fua kaing tix ka maoux mai lih hu ka simiang pui Isarelix, phan ex yuh nan, nawh tee deuh maix klawd pleue." ³² Mawh kheu nan, kix vien nyoi tix ka chee rhix mai fua kaing tix ka maoux khankix mai hu ka simiang Isarelix ah nin, "Kawncau maix Benhadat ah nin, yuh buanson deuh ju aux liak" mai nawh ah nin, "Mawh kawm im ju nawh lie? nawh mawh puxke aux heue." ³³ Pui ankix bre ti nghiet lox nawh mai niied tijhawp ka lox nawh ah nin, "Benhadat mawh puxke maix heue. Hu kok nawh hoek ka aux heue." Khaix an, Benhadat hoek ka nawh mai kieh nawh haok ka piang linglawx brung heue. ³⁴ Khaix an, Benhadat ah nin ka nawh, "Veng pa hoik teei keeing aux khaing maix khankix aux tak deeh tawx, maix pon ti sum biang lah ka son tix ka daux veng Damase awm pa hoik sum keeing aux ka daux veng Samarix heue." Ahap ah nin, "Aux tak deeh ploi maix ing heue." Mawh kheu nan, nawh yuh sijax mukheu mai nawh mai deeh ploi nawh ing heue. ³⁵ Koe simex tix kaux ka daux cao jhai, ah nin ka

paox plawg tix awm gumlox tawm Simiang Siyiex, “Yuh buanson tawk aux liak!” mai pui an thiang tix ang tawk ka nawh heue. ³⁶ Cao jhai an ah nin ka nawh, “Mawh kheu ang maix cu nghiet ka lox Simiang Siyiex, yam lih hu maix khaing aux dommawx doman, sivai sangsi tak kiied maix.” Yam hoik lih hu nawh dommawx doman, sivai sangsi sipub ka nawh mai kiied nawh heue. ³⁷ Khaix an, nawh yaox ka pui tang kaux ah nin, “Yuh buanson tawk aux liak,” mawh kheu nan, pui an tawk nawh, tom kied saux kied mat nawh heue. ³⁸ Khaix an, cao jhai an lih hu mai nawh loh grang tix mai fua ngai tix ka man mai pau simiang daux krax heue. ³⁹ Yam hu preeng simiang ka daux baoh an, nawh kokyo ka simiang ah nin, “Kawncau maix hoik hu ka daux naing, lien tix kaux viex pui tix kaux hoek ka aux ah nin, priex pui in, phan pui in grai son grawng ceu pa yuh ka mawx ang ah, ju maix tak mawh son ju nawh, phan ang mawh nan maix tak plud mau tix talantan heue. ⁴⁰ Yam kawn nie kaing pa yuh kawncau maix tan, nawh hoik grai heue.” Simiang Isarelaax ah nin ka nawh, “Krax prawngca tak koe ka piang maix, awm hoiktat maix an ka son tix heue.” ⁴¹ Nawh niied ti yah man fua khaing ngai tix, yam an simiang Isarelaax tawng ka mawh nawh cao jhai heue. ⁴² Cao jhai ah nin ka nawh, “Simiang Siyiex aux ah nin, mawh kheu ploi maix pa deuh Aux mawh pa lauxleeing lih khaing daux tawm taix maix, mawh kheu nan, ju maix tak mawh son ju nawh mai pui maix khankix kawx tak mawh son pui nawh heue” ⁴³ Mawh kheu nan, simiang Isarelaax deeh ing ka nyiex haw tix ka veng Samarix mai pa laux pakngai mai pa voirhawm tix heue.

21 *Sipeem Plix Siiet Nabok*

Nabok pui veng Yezerelax koe sipeem plix siiet tix guang dex nyiex haw Ahap simiang Samarix ka daux veng Yezerelax heue. ² Ahap ah nin ka Nabok, “Tawx sipeem plix siiet maix ka aux sonsang yuh aux sipeem taux kah, mawh kheu dex mai nyiex haw aux, tang an aux tak tawx maix cie sipeem plix siiet pa nielheu mhawm phan maix khawrhawm kah, aux tak tawx mau awmpa

khaw jum ka maix heue.” ³ Nabok ah nin ka nawh, “Simiang Siyiex tak thiang ka pa sang tawx aux sinngao keeing tix ka maix heue.” ⁴ Ahap deeh laig ka nyiex haw tix ka daux pa laux pakngai mai voirhawm tix, kheu jao lox pa ah Nabok pui veng Yezerelax ka nawh yuh nin, “Aux tak ang pon tawx sinngao haktiex keeing tix ka maix heue.” Ahap it ka piang ku it tix mai veeh ngai tix dee singai mai ang lai ih priex heue. ⁵ Mai moeng nawh Yezabelax hoek ah nin ka nawh, “Yuh patix, maix lai voirhawm mai ang ih priex lie?” ⁶ Nawh deeh ah nin ka moeng tix, “Mawh kheu ah aux nin ka Nabok pui veng Yezerelax, coh sipeem plix siiet maix ka aux, phan khawrhawm maix, aux tak deeh plud guang sipeem plix siiet son an ka maix mai nawh pawklox aux ah nin, aux ang pon tawx sipeem plix siiet tix ka maix heue.” ⁷ Moeng nawh Yezabelax ah nin ka nawh, “Maix mawh pa koe siawp sibrawm ka piang pui Isarelaax ang mawh lie? Kaoh ih priex mai kieh maix koe krax nyawmrhawm, aux tak tawx sipeem plix siiet Nabok pui veng Yezerelax ka maix heue.” ⁸ Yezabelax tiem lai ka min ceukaux Ahap mai tawx cum Ahap kah mai tawx lai an hu ka kuad riex ju mai pui pa koe sibrawm khankix pa ot ka daux veng tau mai Nabok heue. ⁹ Ah yuh nin ka daux lai, “Krai pao kieh tuah pa ih mai kieh Nabok ngawm dee lhaong ka sinax pui khankix” ¹⁰ mai deuh pui ra kaux ngawm ka plak sivoe nawh sonsang mawh kix pa kham mhairug ka son nawh ah nin, maix hoik jhaxlawg ka Siyiex mai ka simiang mai teei nawh lih plak praix mai dheem nawh yum ka simaox heue.” ¹¹ Pui veng nawh khankix, kuad riex ju mai pui pa koe sibrawm pa ot ka daux veng nawh khankix, yuh awm lox pa hoik tiem Yezabelax ka daux lai pa sipaox nawh hoek ka kix heue. ¹² Kieh kix kraipao tuah pa ih mai kieh Nabok ngawm dee lhaong daux sinax pui heue. ¹³ Kieh pui ra kaux ngawm ka plak sivoe nawh mai pui an kham mhairug grawng Nabok ka plak sivoe ngai pui khankix ah nin, “Nabok jhaxlawg ka Siyiex mai ka simiang heue. “Kix teei nawh lih plak praix veng mai dheem nawh yum ka simaox heue. ¹⁴ Kix ploi pui hu ah nin ka

Yezabelax, "Hoik dheem Nabok yum ka simaox heue." ¹⁵ Yam mhong Yezabelax ka hoik dheem kix "Nabok yum ka simaox, Yezabelax ah nin ka Ahap, "Kaoh heue, teei sipeem plix siiet cie Nabok pui veng Yezerelax pa ang nawh cu tix coh ka maix, mawh kheu Nabok ang lai im ju, nawh hoik yum heue." ¹⁶Yam mhong Ahap ka hoik yum Nabok, Ahap yaog ti kaoh mai lih hu sonsang teei ka sipeem plix siiet Nabok pui veng Yezerelax heue. ¹⁷ Khaix an, gumlox Simiang Siyiex hoek ka Eliyax pui veng Tishabix ah nin, ¹⁸ "Kaoh heue, lih hu ti yaox ka Ahap simiang Isarelay pa ot ka veng Samarix heue. Nawh ot ka daux sipeem plix siiet cie Nabok pa hoik teei nawh ti cie heue. ¹⁹ Maix tak kraih ah nin ka nawh, Simiang Siyiex ah yuh nin, "Maix hoik pah cao sipeem yum mai teei ti cie sinngao nawh ang mawh lie? Maix tak ah nin ka nawh, Simiang Siyiex ah nin, lied sox nham Nabok ka dee mawx, sox kawx tak lied nham maix ka dee an heue." ²⁰Khaix an, Ahap ah nin ka Eliyax, "Pui koeng aux eue, hoik yaox maix ka aux lie?" Nawh pawk ah nin, "Aux hoik yaox ka maix, mawh kheu hoik coh maix tokaux tix sonsang yuh pa caox ka plak sivoie ngai Simiang Siyiex heue. ²¹ Jhak heue, aux tak viex pa caoxcaig hoek ka piang maix, Aux tak teei ti tik pex dee singai, Aux tak teei ti tik simex kukaux mai pa giexlaung mai pui pa ploi ka daux pui Isarelay khaing Ahap heue. ²² Aux tak yuh doeh nyiexma maix awm doeh nyiexma Yerobom kawn simex Nebat mai awm doeh nyiexma Basha kawn simex Ahiyax, kheu so maix krax songrhawm Aux mai kieh pui Isarelay yuh phimap heue. ²³ Simiang Siyiex ah nin ka grawng pa dex mai Yezabelax, sox khankix tak ih Yezabelax hawt guh veng Yezerelax heue. ²⁴ Sox tak ih pui Ahap pa yum khankix ka daux veng mai sim raoma tak ih pui yum ka daux tong kaung heue." ²⁵ Ang koe pui pa coh tokaux tix sonsang yuh pa caoxcaig ka plak sivoie ngai Simiang Siyiex awm Ahap ang koe tix kaux kawx, mawh kheu nghiet nawh lox jeehnyaw moeng tix Yezabelax 21:23 2Sim 9:36.

heue. ²⁶ Nawh hoik kied yuh pa seeing brai ka daux pa hawt tix khaix rieanggrang Asherax awm pa hoik yuh pui Amawrix khankix pa hoik grheu Simiang Siyiex khaing plak sivoie pui Isarelay khankix heue. ²⁷ Yam mhong Ahap lox Eliyax, nawh riah kraung ceep tix mai ceep chee rhix mai tuah pa ih mai ti khawm chee rhix mai lailing ka daux pa dahrhawm tix heue. ²⁸ Gumlox Simiang Siyiex hoek ka Eliyax pui veng Tishabix ah nin, ²⁹ "Hoik yaox maix Ahap koe rhawm awn rhawm tiem ka plak sivoie ngai Aux lie? Mawh kheu nawh hoik koe rhawm awn rhawm tiem ka plak sivoie ngai Aux, Aux tak ang viex pa caox hoek ka daux singaig pa im ju nawh, viang mawh nan, Aux tak viex pa caox hoek ka piang doeh nyiexma singaig ju kawn nawh heue."

Mikha Tawx Satix Ka Ahap (2Been 18:1-34)

22 Naing ang lai koe sinax Surix mai Isarelay loe num heue. ² Yam hoek loe num tix num, simiang meung Yudax pa mawh Yehoshaphat hu ti yaox ka simiang meung Isarelay heue. ³ Simiang Isarelay ah nin ka kawncau tix, "Tawng pex veng Ramot pa koe daux haktiex Gilat mawh cie ex lie? Mawh ot yawg ex tix mai ang niied ti teei khaing tawm taix simiang Surix lie?" ⁴ Nawh chawx Yehoshaphat ah nin, "Sang hu puing maix veng Ramot ka daux haktiex Gilat tau mai aux lie?" mai Yehoshaphat ah nin ka simiang Isarelay, "Aux awm rhawm maix, pui aux awm pui maix, brung aux khankix awm brung maix heue." ⁵ Yehoshaphat ah nin ka simiang Isarelay, "Chawx ti yaox ka Simiang Siyiex sivoie ha." ⁶ Khaix an, simiang Isarelay khrawm cao jhai pon yieh kaux tau ah nin ka kix, "Sang caw aux ti hu puing ka veng Ramot ka haktiex Gilat, phan ang mawh nan, ang caw ti hu lie?" mai kix ah nin, "Lih hu heue, mawh kheu Simiang Siyiex tak ap tix tawx veng an ka daux taix simiang heue." ⁷ Yehoshaphat deeh ah nin, "Ang cao jhai Simiang Siyiex lai koe tin sonsang chawxcheng ex ka nawh lie?" ⁸ Simiang Isarelay ah nin ka Yehoshaphat, "Kawn koe Mikha kawn simex Imala pa sang chawxcheng ka Simiang Siyiex, viang mawh nan, aux koeng kanawh mawh kheu ang nawh sax kraih lox jhai pa mhawm ka

gawng aux, nawh yie krai gawng pa caox heue." mai Yehoshaphat deeh ah nin, "Simiang paw doh ah lox yuh nin liak." ⁹ Khaix an, simiang Isarelix kok cao kaing greem nawh tix kaux ah nin, "Viex Mikha kawn simex Imala hoek ka aux phaiphai liak!" ¹⁰ Simiang Isarelix mai Yehoshaphat simiang meung Yudax ceep sibex simiang mai tang ngawm ka danggeung ka biang glah nghox ka diang sivix veng Samarix mai cao jhai khankix hoik tang ah lox jhai ka plak sivoe kix heue." ¹¹ Zedikix kawn simex Khenana yuh teet rhiem son tix ah nin, "Simiang Siyiex ah yuh nin maix tak blung pui Surix tom sidah lauxleeing kix ka teet in heue" ¹² Cao jhai khankix kawx krai lox jhai ah nin, "Hu puing ka veng Ramot haktiex Gilat, hu heue maix tak pex, mawh kheu Simiang Siyiex tak ap kix ka daux tawm taix simiang heue." ¹³ Pui cau pa hoik hu kok Mikha ah nin ka nawh, "Jhak heue, gumlox pa krai cao jhai khankix hoik mawh lox tix gum khaing ka simiang, kieh lox maix awm gumlox pa hoik krai kix, krai ngie gawng pa koe buanson heue." ¹⁴ Mikha ah nin, "Awm pa im ju Simiang Siyiex mai aux tak sikah awm pa krai Simiang Siyiex ka aux heue." ¹⁵ Yam hoek nawh ka simiang mai simiang ah nin ka nawh, "Mikha eue, sang caw ex ti hu puing ka veng Ramot haktiex Gilat, phan ang mawh nan, ang caw ti hu lie?" mai nawh deeh pawk ah nin, "Hu heue, maix tak pex, Simiang Siyiex tak ap veng an ka daux taix simiang heue." ¹⁶ Simiang ah nin ka nawh, "Sang kieh maix aux tiexu miex bawg lie? Sonsang krai maix pa mawmeh ka aux ka daux ceukaux Simiang Siyiex heue." ¹⁷ Nawh ah nin, "Aux hoik yaox pui Isarelix prungprang ka piang gawng awm yung pa ang koe cao liang heue." Mai Simiang Siyiex ah nin, "Pui inkixang lai koe cao simiang, kieh kix deeh ing ka nyiex tix ka daux pa nhim heue." ¹⁸ Simiang Isarelix ah nin ka Yehoshaphat, "Aux hoik krai maix mhong ka ang nawh sax krai lox jhai pa mhawm gawng aux, lheu khaing gawng pa caox ang mawh lie?" ¹⁹ Mikha deeh ah nin, "Mawh kheu nan, nghiet ka gumlox Simiang Siyiex, aux hoik yaox ngawm

22:17 Mat 9:36, Mak 6:34.

Simiang Siyiex ka piang danggeung Nawh mai krunaing raoma khankix cung ka plak khawn dawn mai ka plak khawn goix Nawh Cao heue. ²⁰ Simiang Siyiex ah nin, "Mawh pui mawx pa sang pon nyawglaw ka Ahap, sonsang hu yum nawh ka puing tix veng Ramot haktiex Gilat lie? mawh kheu gawng in, tix kaux ah nin mai tang kaux ah nan heue. ²¹ Khuan tix mu hoek cung ka plak sivoe Simiang Siyiex ah nin, "Aux tak nyawglaw ka nawh heue" ²² Simiang Siyiex ah nin ka nawh, "Maix sang yuh ka mawx?" mai nawh ah nin, "Aux tak lih hu mai deeh yuh ti mawh khuan pa pielhen ka daux jheeh cao jhai nawh khankix heue." mai Nawh Cao ah nin, "Maix tak pon ti nyawglaw nawh mai pex ka nawh, lih hu mai yuh awm an heue. ²³ Jhak heue, Simiang hoik sau khuan pa pielhen ka daux jheeh cao jhai maix khankix mai Simiang Siyiex hoik krai gawng pa caoxcaig maix heue." ²⁴ Khaix an, Zedikix kawn simex Khenana hoek dex mai simang ka sibax Mikha mai ah nin, "Khuan Simiang Siyiex lih hu khaing aux sonsang sikah ka maix yuh ka mawx?" ²⁵ Mikha ah nin, "Jhak heue, maix tak yaox an yam laig mox maix tix daux lawg singaix sax heue." ²⁶ Simiang Isarelix ah nin, "Giex Mikha mai tawx nawh ka Amun cao kuang veng mai ka Yawsha kawn simex simiang" ²⁷ mai ah yuh nin ka simiang, "Sau kaw in ka daux thawng mai tawx nawh ih priex nyaux rawm ka daux pa kha rhawm tom deeh hoek aux ka daux pa nhim heue." ²⁸ Mikha deeh ah nin, "Phan maix yaox ti deeh hoek ka daux pa nhim, Simiang Siyiex ang tau tix sikah gawng in ka aux heue. Nawh ah nin, "Pui khawmuik eue, nghiet heue."

Ahap Yum Ka Daux Naing

²⁹ Simiang Isarelix mai Yehoshaphat simiang pui Yudax haok ka veng Ramot meung Gilat heue. ³⁰ Simiang Isarelix ah nin ka Yehoshaphat, "Aux tak tiehloh grang tix mai laig ka daux naing, viang mawh nan, maix ceep kraung simiang heue." Mawh kheu nan, simiang Isarelix loh grang tix mai laig ka daux naing heue. ³¹ Simiang meung Surix tawm lox ka cao kaing naing linglawx brung tixngoe ra kaux ah nin, "Lheu khaing simiang Isarelix paw puing pui tix kaux kawx heue." ³² Yam yaox cao kaing naing linglawx brung

khankix ka Yehoshaphat, kix ah nin, "An rug mawh simiang Isarelaux heue." Kix deeh veeh ti puing ka nawh mai Yehoshaphat hoik riagyo heue. ³³ Yam yaox cao kaing naing linglawx brung khankix, kaangmawh simiangpui Isarelaux, kix deeh ing plak khaix mai ang pheet nawh heue. ³⁴ Pui tix kaux vaik ak tix mai ang nyee ca nieb puing hu krox ka simiang Isarelaux sinax dee kleuk kraung naing ceep nawh heue. Nawh ah nin ka cao grheu linglawx naing brung tix, "Deeh veeh aux khaing daux naing, mawh kheu hoik mataux heue." ³⁵ Naing baoux niied ti kin singaix an mai simiang hoik neung tix piang pui tix kaux daux linglawx naing brung nawh mai veeh ngai tix ka pui Surix khankix mai yum plak bo heue. Nham lih khaing dee mat nawh mai la ka piang meeh linglawx naing brung heue. ³⁶ Yam hoek bawg yam klip singaix, lox kokyo pui khankix hoik tah sinum ka daux tab ku tab ah nin, "Tang deeh ing ka veng mai ka haktiex tix kukaux daux pui heue." ³⁷ Mawh kheu hoik yum simiang, kix viex nawh ing ka veng Samarix mai sipaung nawh tan heue. ³⁸ Kix phak linglawx naing brung brug nawh ka rawm dung veng Samarix mai sox khankix lied nham nawh awm lox pa hoik krai Simiang Siyiex heue. ³⁹ Kaing pa deuk mai can pa yuh Ahap khankix nyiex haw nga sang pa hoik sum nawh khankix mai veng pa hoik pang nawh khawmuik hoik tiem ti deuh ka daux phuk lai grawng been simiang Isarelaux heue. ⁴⁰ Ahap hoik lauxlee tix tau mai taxdu nawh khankix mai Ahazix kawn simex nawh deeh plud khaix nawh heue.

Yehoshaphat Kuang Meung Yudax

(2Been 20:31-37)

⁴¹ Yehoshaphat kawn simex Asa jah ti kuang meung Yudax, yam kuang Ahap simiang Isarelaux ka haktiex pon num tix num heue. ⁴² Yehoshaphat koe ju tixngoe phuan num, yam jah nawh ti kuang haktiex mai nawh kuang veng Yerusalim tixnga phuan num, ceukaux miex nawh mawh Azubax kawn sibun Shilahix heue. ⁴³ Nawh hawt khaix pa

yuh keeing tix Asa, nawh ang lai via khaing krax ankix mai nawh yuh pa khawcaw ka plak sivoie ngai Simiang Siyiex, viang mawh nan, nawh ang nyang yieh ti tik dee pa lhaong khankix mai pui khankix kawn yuh krax tan mai gleeing nyawng bhawng ka dee pa lhaong heue. ⁴⁴ Yehoshaphat yuh pa nhim tau mai simiang meung Isarelaux heue. ⁴⁵ Kaing pa deuk mai can pa hoik yuh Yehoshaphat khankix mai grawng pa ting riang siawp sibrawm nawh mai pa hoik yuh nawh naing khankix, hoik tiem ti deuh ka daux phuk lai grawng been simiang pui Yudax heue. ⁴⁶ Cub simex kroh pa hawt alo simex pa kawn deuk khankix yam kuang keeing nawh Asa, Yehoshaphat grheu kix lih khaing daux haktiex heue. ⁴⁷ Yam an simiang ang lai koe ka haktiex Edom heue. Mawh ngie cao kuang greem simiang pa koe tix kaux khaing heue. ⁴⁸ Yehoshaphat yuh reu ting ka veng Tasux mai ploi hu ka veng Awphirax sonsang tang khri, viang mawh nan kix ang bleeh tix bawg kawx, mawh kheu reu khankix hoik laux ka dex veng Eziongebax heue. ⁴⁹ Ahazix kawn simex Ahap ah nin ka Yehoshaphat, "Kieh kawncaw aux khankix hu tau mai kawncaw maix daux reu ting maix liak!" Viang mawh nan, Yehoshaphat ang cu heue. ⁵⁰ Yehoshaphat hoik lauxlee tix tau mai taxdu nawh khankix mai sipaung nawh tau mai taxdu nawh ka daux veng Davit, Yehoram kawn simex nawh deeh plud khaix nawh heue.

Ahazix Kuang Meung Isarelaux

⁵¹ Yam kuang Yehoshaphat simiang meung Yudax ka haktiex kao aliah num tix num, Ahazix kawn simex Ahap jah tix kuang ka pui Isarelaux daux veng Samarix ra num. ⁵² Nawh hoik yuh pa caoxcaig plak sivoie ngai Simiang Siyiex mai hawt daux krax hu keeing tix mai miex tix mai krax hu Yerobom kawn simex Nebat pa kieh pui Isarelaux yuh phimap heue. ⁵³ Nawh yuh kaing jhaw siyiex Balax mai krub ka nawh mai nawh hoik so krax songrhawm Simiang Siyiex pui Isarelaux, awm pa hoik yuh keeing tix khawmuik heue.